

皇朝史略

青山延于著



5甲
2703
1-8



明
2755
卷

皇朝史略

含雪樓藏版

藤年
海氏書



皇朝史略序

藤年
氏遺愛之記

黃門西山公大開史館延



儒士編修國史總括上下二千
歲為十餘萬言草編年之體創
紀傳之制焉歷世治亂興衰之
蹟典禮沿革之詳彰然如日星

皇朝史略

序

皇朝史略
卷四
麗天洵萬世帝王資治之殿鑒
也彰考館國史總裁青山子世
三世鴻儒一藩領袖於書無所
不窺尤邃于史學至論其世則
滾滾不休聽者屈服嘗據

黃門公之史掇要汲詳勒成皇
朝史略一書體裁因編年筆削
宗公議敘事高古精嚴務剗繁
縟一歸簡質展覽間歷世治亂
成敗人臣功罪之蹟典章文物
因革損益之大犁然如指諸掌
也乙酉仲夏訪余村居而索序

其首余草茅懼儒自分寒素况
老病日加語言支離而廁名縉
紳自揣贅列甚矣子世不肯曰
學問之道何論貴賤固以為請
乃妄搽翰書之并記余榮云
文政乙酉夏五月龜田興謹識

皇朝史略序

史豈易作哉自非兼備三長而不拘四患者則五難
之目或不能免故以遷固之學之文猶且有記繁而
志寡之謂何況其他乎然其人削羅全史眼高一世
筆削次第不藉衆功後世之史雖或出於衆手者亦
各用所長以成一家言但辭之繁簡以事文之今古
以時則其間雖詳略不同得失互有要皆足稱一代
之良矣然其一代事蹟所見異辭所聞異辭所傳聞
又異辭况且碑版案牘多傳軼事野史小說間存遺

皇朝文獻通考 卷之四
一
聞一出入孰信孰偽國是不定公論焉在豈嘗總
會之為難裁成亦未易也而作史之家去取予奪以
一筆自任則糾謬漏落不能免後人指摘也故曰作
史難史豈易讀哉若善讀史者上下數千年出入數
十史窮源竟委臣細靡遺別其同異審其得失刊其
誤砭其闕欲以救諸史之失而為一代實錄也又且
謂全史卷帙浩繁不易周覽况復事蹟錯出本末難
審觀者望洋莫知津涯是豈作者本意哉但其紀傳
之體不得不然於是乎會萃諸史為編年之體通鑑
其詳而備者也史略其簡而要者也書殊體裁人易
觀覽斯蓋非具作史之才與學與識者又烏能得敘
事簡明詳略協體哉故曰讀史亦難

皇朝自六國史而下私史家乘代不乏書古事往蹟
文獻可徵及

王室中襄武矣為政史非其人書失其體言皆瑣碎
事必叢脞識小而遺大詳內則略外識者不能無遺
憾焉 水戶黃門義公大開史局廣集群儒訪金
匱之秘探名山之藏軼事遺聞網羅殆盡作大日本

皇朝通志 序
史二百四十六卷其文則史其義則 公竊取之
凡事關名教者特秉鴻裁以扶明大義其體大而思
精不但稱實錄而已然而謙光之至不欲以作者自
居藏諸書府未經刊行其原稿散落在人間者輾轉
傳寫漸失面目猶且流傳不廣購求非易有志之士
往往恨焉今史館總裁青山君拙齋學問淵博才識
宏遠為文精核而有體要嘗著皇朝史略十二卷其
辭約而旨暢文省而事備舉數千年治亂興廢與夫
典章經制之沿革興除首尾該貫逐年為編使觀者
瞭然如燭照而計數焉其惠後學大矣後之讀史者
先讀史略然後讀全史史豈難讀哉即使不能一睹
全史亦能讀史略而審一治一亂所由大經大法所
存則固與全史無異也而有志之士亦可以無恨矣
然則如史略者可不梓而傳乎又可序而言乎故
序

文政丙戌冬十月

江戸後學朝川鼎謹撰

新潟卷大任書

夫史者所以辨得失明是非也無史則已苟有史則使是非得失治亂興衰之迹瞭然於卷冊之間庶乎可以為良史也其大命之

本朝日本紀以後世有實錄然史官書當時之事不能無隱諱而是非得失頗有失其實者六國史以後世無正史裨官野乘紛然雜出是非淆亂莫以折衷後世何以考信哉我義公憂之實始脩國史初紀傳之體罔羅古今錯

皇朝通志 卷四
序
綜諸說以成一家之言闡幽微顯使是非得失之
迹粲然可觀真可謂不刊之典矣延于不敏承乏
侍罪史館校訂國史與脩諸志日得徧窺

本朝之載籍於是隱括舊史旁攷稗官野乘約為
史略以授童蒙雖記載無統挂一漏萬然於攷治
亂得失之迹亦可觀其大略也延于嘗高推古今

以謂天下之大勢蓋三變矣上古封建之時世質
人朴天下奉灋政出則其非也然史限已尚存矣
王室至大化始置國司郡領封建悉廢天下之勢
一變矣大寶以沒制度大備典章可觀然外威寢
盛政歸攝關天下之勢又一變矣保平以降

王室失馭武臣專政諸國置守護地頭而與攷之
權悉歸關東天下之勢至是又大變矣此廼讀史
之關鍵而斯書之要領也若夫緝目兼舉本末畢
備則有全史在焉豈斯書之所能盡哉雖然以管
窺豹雖未見其全體亦足以知其一斑以指探鼎
雖未嘗其全味亦足以得其一齋則史略之書亦
可少哉文政壬午秋八月

青山延于謹序



凡例十則

一大日本史校刻粗就漸經進奏然未廣布人間且其書卷袤浩瀚初學之士不便披閱今乃竊節略以為史略但其攷本書之出典更加訂補其詳略取捨不必依紀傳之舊非敢私改竄不刊之典讀者諒諸

一是編體裁做十八史略及十九史略然二書或係年或否難以為準今是編推古已前行曆法則槩不係年月從古事記書法推古十二年始行曆法自是已後係以年月云

一除正史之外悉註出書以便考索若日本後紀殘缺

不完參以紀略故雖正史註其所出以別之
一三公除拜薨皆書其餘除拜薨卒有關係者書之
一書某某之子或孫或弟之類依通鑑例使讀者知世
系之所自
一本史悉舉諸書異同而史略之體務從簡約故今不
悉註焉
一是編多採本史所逸者以廣見聞
一原始有關係者書之無關係者不悉書焉
一應永已後別為後編
一本史所引用諸書多者採其要者他從省略

皇朝史略卷之一

水府史臣青山延于著

神武天皇諱彥火火出見天祖大日靈尊治高天原實
有明德照臨六合是為天照大神大神之子曰正哉吾
勝勝速日天忍穗耳尊忍穗耳尊生天津彥彥火瓊瓊
杵尊天祖以八坂瓊曲玉天叢雲劍及八咫鏡賜之世
世傳以為寶瓊瓊杵尊降居日向高千穗峰娶大山祇
女木華閼邪姬生彥火火出見尊彥火火出見尊娶海
神豐玉彥女豐玉姬生彥波瀲武鸕鷀草不合尊帝其



第四子也母曰玉依姬生而明達年十五立為太子年
四十五在高千穗宮高千穗宮據古事記時西州已服東國未平
長髓彥奉饒速日命為主兄猾弟猾八十梟帥兄磯城
弟磯城等各為君長不相統一帝與諸兄及皇子謀起
師征之至吉備國造行宮居之三歲備舟楫蓄兵食遂
帥舟師東下歷浪速河內勒兵赴龍田路險隘不得並
行欲東踰膽駒山而入中州長髓彥盡衆徼之孔舍衙
坂與戰不利皇兄五瀨命中流矢師不能進帝以為我
日神子孫而向日征虜不祥也不若退還示弱背日而
討之乃引還五瀨命道薨進至紀伊誅名草戶畔遂經

狹野抵熊野絕海而進遇暴風漂蕩皇兄稻飯命三毛
入野命憤恚自投海帝獨與皇子手研耳命進至荒坂
津誅丹敷戶畔又進至菟田誅兄猾弟猾納款進擊八
十梟帥於國見岳兄磯城於墨坂斬之遂進討長髓彥
饒速日命殺長髓彥以降中州悉平乃奠都於大和檀
原遂即天皇位○道臣命帥來目部護衛宮門道臣以下古語
遺拾道臣命初名日臣命從帝東征至熊野帝欲進入中
州山路險絕不得前日臣命帥來目部披榛通道遂達
菟田下縣帝嘉之因賜名道臣○初可美真手以其所
傳天瑞寶獻於帝帝嘉之殊加寵異又率天物部討賊

有功至是奉瑞寶暨神盾又奉布都主神劍於殿內為
 帝鎮祭帝乃命宿衛殿內因號足尼足尼之號自此始
 也初以下舊事記可美真手饒速日之子也○高倉下紀伊熊
 野人帝之誅丹敷戶畔也妖神吐毒衆咸迷倒高倉下
 夢天照大神謂武甕雷神曰葦原中國擾亂未息汝往
 征之武甕雷對曰降予平國之劍則國將自平矣乃謂
 高倉下曰我有劍名部靈今置之汝庫中宜取而獻之
 天孫明日入庫視之果得靈劍即至軍獻之時帝適寐
 及高倉下至忽寤衆亦尋起竟平群兇○封椎根津彥
 為倭國造弟猾為猛田縣主初帝東征至速吸門有漁

人來迎名曰珍彥帝命為鄉導賜名椎根津彥及至菟
 田賊兵據守險要道梗不通帝夢有神誨曰互取天香
 山土以造天平瓮及嚴瓮敬祭神祇則虜自平矣會弟
 猾上言亦與夢協乃使椎根津彥及弟猾往取天香山
 土時賊兵充塞椎根津彥等羸服微行遂獲土而還帝
 大喜乃造八十平瓮嚴瓮祭神祇於丹生川上賊果平
 至是帝錄功封之○詔作時於鳥見山祭皇祖天神○
 帝巡幸登腋上嗛間丘望地形曰美哉國也似蜻蛉之
 銜尾矣由是始有秋津洲之號蜻蛉秋津訓讀相通○立皇子神
 淳川耳尊為皇太子○帝在位七十六年崩壽一百二

十七葬畝傍山東北陵太子立是為綏靖天皇

綏靖天皇神武帝第三子也母媛蹈鞬五十鈴媛皇后

帝天姿岐嶷少有雄氣及長沉毅善武技性至孝在諒

闇悲慕無已委庶務於庶兄手研耳命手研耳命久典

樞機威福由己潛圖不軌帝知而密為之備及山陵事

畢與母兄神八井耳命謀除之會手研耳命獨卧窟室

帝與神八井耳命排闥而入使神八井耳命射之戰慄

不能發矢帝乃奪其弓矢射而殛之○都於葛城是謂

高丘宮○立磯城津彥玉手者尊為皇太子○帝在位

三十三年崩壽八十四太子立是為安寧天皇

安寧天皇綏靖帝子也母五十鈴依媛皇后○遷都片

鹽謂之浮孔宮○立大日本彥耜友尊為皇太子在位

三十八年崩壽五十七太子立是為懿德天皇

懿德天皇安寧帝第二子也母淳名底仲媛皇后○遷

都於輕謂之曲峽宮○立觀松彥香殖稻尊為皇太子

在位三十四年崩壽七十七本書享年關古事記曰肆

子年十六之文推之從水鏡皇太子立是為孝昭天皇

孝昭天皇懿德帝子也母天豐津媛皇后○遷都掖上

謂之池心宮○立日本足彥國押人尊為皇太子在位

八十三年崩壽一百十四本書享年關今據本書立為

鏡皇代記皇年代太子立是為孝安天皇

孝安天皇孝昭帝第二子也母世襲足媛皇后○遷都

於室謂之秋津島宮○立大日本根子彥太瓊尊為皇

太子在位一百二年崩壽一百三十七歲本書享年闕古事記曰壹

從水鏡皇代紀皇年代略記太子立是為孝靈天皇

孝靈天皇孝安帝子也母押媛皇后○遷都黑田謂之

盧戶宮○立彥國牽尊為皇太子按神皇正統記曰秦始皇遣使求不死藥

然舊史所不載故今不取在位七十六年崩壽一百二十八歲本書享年

闕古事記曰壹佰陸歲水鏡百三十四正統記百十年據本書立為太子年二十六之文推之從愚管抄皇年

代略太子立是為孝元天皇

孝元天皇孝靈帝長子也母細媛皇后○遷都於輕謂

之境原宮○立稚日本根子彥大日日尊為皇太子在位

五十七年崩壽一百一十六歲本書享年闕古事記曰伍拾柒歲水鏡百十七

今據本書年十九立為太子太子立是為開化天皇

開化天皇孝元帝第二子也母齋色謎皇后○遷都春

日謂之率川宮○立御間城入彥尊為皇太子在位六

十年崩壽一百一十一歲太子立是為崇神天皇

崇神天皇開化帝第二子也母伊香色謎皇后帝性聰

敏幼有雄略及壯寬弘謹慎恒有經綸大業之志○遷

都磯城謂之瑞籬宮○始祀天祖天照大神於倭笠縫

初天祖以寶鏡賜皇孫曰汝視之當猶視吾宜同牀共
 殿以奉祀焉故歷世祀之殿內至是畏其瀆神建祠筮
 縫奉安神鏡及靈劍使皇女豐鍬入姬侍祠更造鏡劍
 以為護身之器奉安鏡劍及造鏡又命皇女淳名城入
 姬祭大國魂神○帝憂疾疫大行民多死亡於是幸神
 淺茅原卜之於八十萬神乃祭大物主神命伊香色雄
 為班幣物者使大田田根子祭大物主神長尾市祭倭
 大國魂神既而又祭八十萬神定天社國社神地神戶
 於是疾疫始息年豐民安○遣大彥命於北陸武渟川
 別於東海吉備津彥命於西道丹波道主命於丹波因

詔曰有不從命者舉兵伐之授印綬以為將軍置將軍
 始此將軍始此及發會武埴安彥反欲襲京師即命大
 彥命吉備津彥命彥國葺討平之既而大彥命等奉詔
 各往四道威德大行○始校人民更課調役○始造船
 船○立活日尊為皇太子令豐城命治東國○任那國
 始遣蘇那曷叱知朝貢任那去筑紫二千餘里在雞林
 之西南○帝在位六十八年崩壽一百二十歲帝崇重
 神祇用心民事家給人足天下大治故稱御肇國天皇
 太子立是為垂仁天皇
 垂仁天皇崇神帝第三子也母御間城姬皇后幼而岐

疑及長倜儻有大度崇神帝鍾愛之常置左右嘗謂帝
 及豐城命曰朕於二子慈愛無異未知孰為嗣有夢互
 告朕以此占之二皇子沐浴而寢明日豐城命入奏夢
 登御諸山東嚮弄槍者八擊刀者八帝奏夢登御諸山
 巔緇繩四方逐啄粟雀崇神帝諭之曰兄唯東嚮互治
 東國弟臨四方互繼朕位遂立為太子至是即位○遷
 都纏向謂之珠城宮○新羅王子天日槍歸化藏其所
 齋寶物於但馬土人崇奉謂之出石社出石社據古事記○狹
 穗彥謀反使八綱田將兵討之狹穗彥伏誅狹穗彥皇
 后母兄也初狹穗彥潛圖不軌密謂皇后曰夫以色事

以色衰寵弛若使我得志與汝共蒞天下汝長無憂矣
 乃以匕首授之使伺帝寐刺之會帝幸來目高宮枕后
 膝而寢后思兄言悲泣不禁淚落帝面帝寤謂后曰朕
 夢錦色小蛇匝頸有兩從狹穗彥來沾朕面是何祥也后
 悚懼具以實告帝曰是非汝罪也乃使八綱田討之狹
 穗彥堅城拒守后曰止吾兄吾何顏復蒞天下迺抱皇
 子奔投城中帝諭狹穗彥使出后及皇子狹穗彥不聽
 八綱田遂縱火焚城后使人抱皇子出城遂偕狹穗彥
 死城中八綱田豐城入彥之子也豐城入彥子據姓氏錄○野見
 宿禰出雲人天穗日命之裔也以勇力聞時當麻邑有

當麻蹶速膂力絕人常誇其勇以為天下之人無能抗
己者帝聞之求其對或薦野見帝乃召二人命角力野
見蹶蹶速脅腰骨折而斃輒以其田宅賜之○帝使倭
姬代豐歛入姬祀天照大神倭姬奏遷之於伊勢建齋
宮於五十鈴川上○令祠官卜兵器為祭幣吉乃納弓
矢刀於諸社更定神地神戶以時祭之以兵器祭神始
此○皇后日葉酢媛崩先是皇弟倭彥命薨以其近習
為殉晝夜哀號聲聞于外帝聞而惻之詔禁殉死至是
帝使群臣議之野見宿禰奏請以土偶代之帝嘉之立
為永制以野見任土部職自後土部連世掌大喪云○

令諸國開池溝凡八百以便灌溉民賴殷富○立大足

彥尊為皇太子○按歷代皇紀濫觴抄並云是時始遣

不取東夷傳云中元二年倭奴國奉貢朝賀使人自稱

大夫國之極南界也又魏志倭人傳有伊都國日本紀

所謂伊觀國即今筑前怡土郡是也伊觀倭奴相通據

此則是時遣使者伊觀國造而非朝廷遣使明矣近世

筑前人有得古印者文曰委奴國王之印蓋漢時之所

授也委倭古字通用後世以倭為音和為日本總稱誤

也○帝在位九十九年崩壽一百四十歲初帝遣田道

間守求非時香菓於常世國及間守還帝已崩間守至

伏見陵慟哭而死聞者傷惋焉太子立是為景行天皇

景行天皇垂仁帝第三子也母日葉酢媛皇后帝容貌

雄偉長一丈二寸容貌已下帝嘗與兄五十瓊敷命侍

垂仁帝帝曰二子試言所欲五十瓊敷命曰願得弓矢
帝曰願得大位因賜弓矢於五十瓊敷命謂帝曰汝宜
嗣朕位於是儲位乃定○都纏向謂之日代宮○筑紫
熊襲反車駕親征至日向居高屋宮召群寮議討熊襲
有一臣進曰彼有二女曰市乾鹿文市鹿文有勇且美
宜啗以重幣誘納之使其圖之帝從之招納二女陽寵
市乾鹿文既而市乾鹿文奏曰妾有一計得從兵兩人
足以辦事帝聽之市乾鹿文歸家飲酒以醇酒伺其醉
卧密斷弓弦從兵進殺之帝惡其大逆誅市乾鹿文以
妹市鹿文賜火國造襲國悉平帝居高屋宮六年一日

幸丹裳小野東望謂左右曰是國也直向日出方因號
其國曰日向帝思婦作歌是謂思邦歌○帝發高屋宮
巡狩筑紫從葦北浮海夜冥不知所向望見火光即得
著岬帝問曰邑名為何國人對曰八代縣豐村使尋其
火莫知處所故名其國曰火國○遣武内宿禰觀察東
北諸國地形民風武内還奏東夷之中有日高見國男
女椎結文身風俗勇悍號曰蝦夷土地膏沃可擊而取
也○熊襲復反命皇子日本武尊討之日本武尊時年
十六將發曰我欲得善射者與之共行或薦美濃弟彦
公日本武尊遣人召之弟彦乃率其國人石占橫立及

尾張田子稻置乳近稻置偕來日本武尊進至熊襲國
察其形勢賊魁名取石鹿文適宴其親族日本武尊被
髮為童女裝置劍裊中入居婢妾之中賊魁見而悅之
延置座側舉杯戲狎夜闌眾散賊魁被酒而臥日本武
尊拔劍刺之未殊曰汝為誰曰我是大足彥天皇之子
名日本童男賊魁曰吾嘗見強勇者未有若皇子者吾
雖賤陋願上嘉號曰日本武尊言訖遂刺殺之自是稱
日本武尊既而分遣弟彥等討滅醜類熊襲悉平○東
夷反帝又使日本武尊征之吉備武彥大伴武日從焉
日本武尊過伊勢拜神宮倭姬以神劍授之進至駿河

土賊欲誘日本武尊殺之乃勸之游獵因縱火燒野日
本武尊鑽燧取火反燒賊徒時挺劍雜艸賴以得免由
是名叢雲劍曰草薙云按本書一說劍自抽雜草遂擊
賊殲焉因號其處曰燒津進歷相模將往上總海上遇
風船將覆沒時妃橘媛從白日本武尊曰海神為崇妾
請以身贖之言訖投海暴風即止遂得著岬自上總轉
入陸奧進至蝦夷境賊首望風降附蝦夷悉平還至伊
勢能褒野而疾使吉備武彥奏捷京師遂薨于能褒野
時年三十帝大悼惜錄其功為定武部○立皇子稚足
彥尊為皇太子以武內宿禰為棟梁臣○以彥狹島王

拜東山道十五國都督薨于道使其子御諸別王襲職
時蝦夷擾亂御諸別討平之○帝幸近江居志賀謂之
高穴穗宮在位六十年崩于高穴穗宮壽一百有六歲
太子立是為成務天皇

成務天皇景行帝第四子也母八坂入姬皇后景行帝
嘗宴群臣帝及武內宿禰不至召問故對曰百僚宴樂
情在戲游一有急變恐不能禦故侍門下以備非常帝
嘉之遂立為太子景行帝崩即位於高穴穗宮○以武

內宿禰為大臣置大臣始此置大臣以下據曆○令國
郡立造長縣邑置稻置按古事記成務紀曰定大國小

稻置與縣主同然古事記景行紀云以諸皇子為國造
和氣及稻置縣主據此則稻置之外又有縣主蓋邑長
稱治租稅者而言則謂之縣主乎姑附備攷界山河分國縣

百姓安居居天下大治○立皇姪足仲彥為皇太子在位
六十年崩壽一百有七歲太子立是為仲哀天皇

仲哀天皇日本武尊第二子也母兩道入姬帝容姿端
正身長十尺○以大伴武以為大連置大連始此大伴

據曆運記○詔諸國貢白鳥養之於日本武尊之陵池
愚管抄

初日本武尊之薨也景行帝悲哀詔遣群卿百寮葬之
能褒野有白鳥出兆域飛去開棺視之唯有明衣於是
遣使追尋其鳥集倭琴彈原因造陵於其地白鳥又飛

至河內止舊市邑因又作陵時人號三陵曰白鳥陵至是帝思慕不已故有是命○行幸角鹿造行宮而居之謂之筭飯宮帝巡狩南國留皇后及百寮於角鹿從駕者僅數百行至紀伊會熊襲及帝帥舟師親征遣使角鹿令皇后會于穴門造宮室居之謂之豐浦宮○帝幸筑紫居檀日宮會群臣議討熊襲時有神憑皇后曰西方有國是謂新羅如能祭我我當使帝有之如彼熊襲何足勞師旅乎西方以下參取古事記帝乃登山望海曠遠無所見帝竟不之信一日帝暴病崩于檀日宮後世立祠以祀焉謂之檀日廟檀日或作香推朝廷有事祭告後世以下據拾芥抄有事

祭告日略在位九年壽五十二皇后秘不發喪詔中臣烏賊津大三輪大友主物部膽咋大伴武以等帥百僚守衛宮中密令武內宿禰奉梓宮至穴戶殯於豐浦宮皇后傷帝慢神早崩乃自齋戒再請神教隨教而祭即遣鴨別討熊襲旬日而服於是決意西征令諸國造戰艦練兵甲皇后身為丈夫裝執斧鉞令三軍時皇后有身適當產月乃取石挿腰祝曰願事畢還日免於茲土遂發和珥津大魚夾船風順船迅不勞擄楫直抵新羅潮水怒漲溢及國中新羅王波沙寐錦按三國史記東國通鑑為婆娑尼師今即惶遽不知所為面縛來降乃解其縛遂入其都封

府庫收圖籍以所杖矛樹之國門其矛傳在國門云新

羅王以波珍干岐微叱已知為質按釋日本紀曰波珍

作微叱已知波珍干岐今訂之獻金銀彩色綾羅縑絹八十船自後調

貢以八十艘為定額高麗百濟亦望風歸降於是三韓

悉服乃置官司振旅而還至筑紫蚊田生皇子是為應

神天皇

皇朝史略卷之一
皇朝史略卷之二
皇朝史略卷之三
皇朝史略卷之四
皇朝史略卷之五
皇朝史略卷之六
皇朝史略卷之七
皇朝史略卷之八
皇朝史略卷之九
皇朝史略卷之十
皇朝史略卷之十一
皇朝史略卷之十二
皇朝史略卷之十三
皇朝史略卷之十四
皇朝史略卷之十五
皇朝史略卷之十六
皇朝史略卷之十七
皇朝史略卷之十八
皇朝史略卷之十九
皇朝史略卷之二十

皇朝史略卷之二 高麗新羅百濟

水府史臣青山延于著

延光校

應神天皇仲哀帝第四子也母氣長足姬皇后幼而聰

達玄鑿深遠動容進止聖表有異初帝在孕皇后西征

及生腕上肉起如鞞似皇后雄裝負鞞故名譽田按本

古謂鞞亦稱胎中天皇本書繼○皇后奉帝帥百僚至

豐浦宮發仲哀帝喪將奉梓宮還京時帝庶兄麿坂忍

熊二王舉兵要皇師于播磨會麿坂死忍熊退屯住吉

皇后直向難波忍熊退軍菟路皇后乃會帝於紀伊日

高入小竹宮議進討時天晦暝如夜連日皇后遣武內宿禰擊忍熊忍熊敗死群臣尊皇后曰皇太后臨朝攝政立帝為皇太子時年三歲都磐余謂之稚櫻宮○新羅遣使朝貢微叱已知請歸國許之遣葛城襲津彦送之是時遣使於魏魏主遣建中校尉梯携報聘○百濟遣使與新羅使朝貢時新羅奪百濟貢物相易而獻敕責新羅使者遣千熊長彥於新羅責問之○以荒田別鹿我別為將率百濟人久氏等討新羅破之遂定比自焮南加羅喙國安羅多羅卓淳加羅七國屠南蠻枕彌多禮以其地賜百濟其後新羅不朝使葛城襲津彦討之是時遣使於晉○太后攝

政六十九年崩壽一百歲是為神功皇后太子即位都輕島謂之明宮都輕島已下古事記○東蝦夷朝貢即使蝦夷作廐坂道○初百濟王枕流卒子阿花年少叔父辰斯篡立至是遣紀角羽田矢代蘇我石川平群木菟於百濟責辰斯失禮國人殺辰斯以謝角等立阿花而歸○定諸國海人山守部○令伊豆作船長十丈試之於海輕疾如馳名曰枯野按枯輕訓讀相通野語助後船朽壞毀之為薪以煮鹽帝得其焦餘異之命作琴果良材也○高麗百濟新羅任那入貢使武內宿禰領韓人作池因號韓人池○遣武內宿禰巡察筑紫時其弟甘美內宿禰譖於帝

曰武內據筑紫招三韓以圖不軌帝信之遣使殺武內
 有真根子者代武內而死武內竊逃歸詣闕自明帝鞠
 訊武內及甘美內使二人探湯於磯城川濱質情偽於
 神祇甘美內服罪武內執佩刀毆之踣地隨而欲殺之
 帝特詔釋之賜紀伊直等之祖以為拏武內執政如故
 ○百濟功滿王之子弓月君請率其國人歸化功滿王
氏遣葛城襲津彥於加羅迎之○百濟王貢縫衣女其
 後使子阿直岐貢良馬阿直岐通經典帝問之曰汝國
 有博士賢於汝者乎對曰有王仁者一國之秀也帝乃
 遣荒田別徵王仁百濟王使王仁古事記作和邇吉師
王仁和邇訓讀相通

率冶工卓素吳服西素釀酒仁番等來朝獻論語十卷

千字文一卷率已下文文教之興始此神皇正統記○百濟王

阿花卒使阿直岐還國嗣位○遣平群木菟的戶田率

兵討新羅先是襲津彥至加羅迎弓月人口為新羅所

留至是新羅王服罪木菟等遂將襲津彥及弓月人口

而歸木菟武內宿禰之子也○帝幸吉野國樺人獻醴

酒奏風俗歌自後貢獻歲以為常○漢主劉宏之裔漢主

己下姓阿知使主及其子都加使主率十七縣人口來

歸奏曰帶方男女皆有才藝近者寓百濟高麗之間心

懷猶豫未知去就請垂天恩以招徠之帝遣使召之以

為公民諸國漢氏其後也奏已下續日本紀○遣阿知使主于

吳求縫工女吳主遣女工四人○立皇子稚郎子為皇

太子先是高麗入貢表辭慢稚郎子讀之大怒召使者

讓其無禮面壞其表稚郎子幼好讀書師阿直岐王仁

博通典籍帝甚鍾愛至是立為太子命大鷦鷯皇子輔

之使大山守皇子掌山川林野○帝在位四十一年崩

壽一百一十歲元明帝和銅五年祀帝於豐前宇佐郡

號八幡大神宮元明已下宇佐託宜集清和帝創石清水社以為

宗廟歲時奉祀焉石清水八幡緣起神皇正統記皇子大鷦鷯尊立是

為仁德天皇

仁德天皇應神帝第四子也母仲姬皇后帝之生也有

木兔入殿是日大臣武內宿禰亦生子鷦鷯入室應神

帝以為祥謂武內曰今朕子與大臣之子同日而生並

有瑞祥取其鳥名相易名子因名帝曰大鷦鷯應神帝

既立少子稚郎子為太子令帝輔之及應神帝崩太子

讓位于帝避之菟道宮帝以名分素定不聽會大山守

皇子謀反帝知其謀密告太子殺之太子固欲帝踐位

而相讓三年帝執志益確太子知其不可奪乃自殺帝

遂即位

外史氏曰立子以長年鈞以賢此萬世不易之大經

也。應神以私愛立少子固失長幼之序夫。帝之
立之以嫡耶。仁德嫡也。稚郎庶也。則。仁德宜立
而稚郎不宜立焉。以賢耶。則。仁德尤賢。稚郎雖賢
不宜以弟先。兄雖然。稚郎既居儲位。名分已定。則稚
郎之讓。仁德不得不辭焉。然則稚郎何以不讓於
應神。建儲之時而於。應神既崩之後曰。應神
愛稚郎而立之。而稚郎讓之。是傷父志也。故隱忍至
是。殺身以成其志。若稚郎者可謂仁且孝矣。稚郎之
薨。仁德不獲已而後即位。則兄弟相讓。兩得其互
應神始崇文教。以禮讓為天下其効如此。國家之

所以興非徒然也。十因命置觀世音菩薩王
○都攝津難波謂之高津宮。宮室不聖。務從節儉。一日
帝登臺遠望。人烟不起。以為百姓窮乏。家無炊者。詔除
課役。三年宮垣頽敗。無所營作。比及三年。五穀豐穰。百
姓殷富。歡聲盈路。其後帝復登臺遠望。見炊煙盛起。謂
皇后曰。朕既富矣。復何憂乎。后曰。今宮室朽壞。不免暴
露。何謂富乎。帝曰。君以民為本。民貧則朕貧也。民富則
朕富也。未有民富而君貧者矣。今炊煙盛起。富庶可知
也。諸國請輸稅調。以修宮室。不聽。後數年。始科課役。造
宮室。百姓扶老携幼。爭先來赴。運財負簣。日夜營作。未

幾宮室悉成○帝憂河水橫溢居民被害詔疏河流穿
 渠宮北號曰掘江又築茨田堤以防北河○高麗入貢
 獻鐵盾鐵的帝饗之於朝大會群臣令射鐵的衆莫能
 穿惟戶田宿禰射而洞之使人大驚起而羅拜帝嘉賞
 特賜姓名的戶田宿禰○立去來穗別尊為皇太子○
 以諸秦氏分處諸郡使養蠶織絹以貢帝嘉秦氏所獻
 柔軟愜體賜普洞王姓波陀普洞王者弓月君之子也
 以諸己下
 姓氏錄 ○始置鷹甘部初依網阿弭古得鷹獻帝帝
 令酒君養之未幾得馴酒君著條繫鈴臂之以獻帝獵
 百舌野試之獲雉數十因命置鷹甘部酒君者普洞王

之子也○初新羅不朝貢遣的戶田賢遺臣責問之新
 羅懼乃貢調絹雜品凡八十艘後朝貢復絕遣竹葉瀨
 責之竹葉瀨途獲白鹿還獻之重遣其弟田道率精兵
 擊之詔曰新羅若阻命宜急擊之新羅果反數來挑戰
 田道固壘不出獲新羅卒問軍虛實對曰有百衝者驍
 勇絕倫每為右軍先鋒若擊其左破之必矣田道選精
 騎擊其左軍新羅兵大敗乘勝縱擊殺傷數百虜四邑
 人民以歸○蝦夷反遣田道討之田道敗死從者取其
 手纏帛授田道妻妻大悲慟即抱手纏縊死時人傷惋
 ○大臣武內宿禰薨大臣已下水宿禰孝元帝曾孫屋

主忍男武雄心命之子也歷事景行成務仲哀應神及帝

五朝至是薨在官二百四十四年歷事已下水不詳其

年壽云按諸書所載年壽不一故今不取○始置冰室初大中彦皇子

獵于鬪雞望野有如屋廬使人視之則窟也召鬪雞稻

置大山主問之曰冰室也掘土丈餘藏冰其中以草覆

之比至夏月出而用之大中彦乃獻之帝大悅自是每

季冬伐冰藏之至春分頒之○遣難波根子武振熊誅

飛驒賊宿難宿難為人前後二面四手四足膂力絕人

左右佩劍四手執弓恃力拒命掠略人民至是命武振

熊討之○縣守吉備國人勇悍多力輕捷絕倫時吉備

中國川島河有巨蚪行旅被害死者交道縣守患之攘

臂入水拔劍斬蚪悉斷其種類河水為赤時人服其勇

因號其淵曰縣守淵○帝崩在位八十七年壽一百一

十歲本書享年闕古事記為捌拾參歲誤也今從水鏡皇代記皇年代略記帝性明叡專

心政事躬行節儉輕賦薄斂百姓殷富教化大行稱為

聖帝聖帝據古事記嘗與皇后避暑高臺聞菟餓野鹿鳴愛之

一夕鹿不鳴明日猪名縣佐伯部獻鹿帝問何處獲之

曰獲之菟餓野帝謂皇后曰計獲鹿之日與所獲之地

盖朕所愛者也獲者雖無心朕未釋然不欲使彼近皇

居乃命移佐伯部於安藝其慈仁愛物如此太子立是

為履中天皇

履中天皇仁德帝長子也母磐之媛皇后仁德帝崩帝既除喪未即位會住吉仲皇子反舉兵圍宮帝方被酒而臥時平群木菟物部大前阿知使主等入告帝不信木菟等扶帝上馬而逃仲皇子遂焚宮帝至河內埴生坂而醒顧視煙燄大驚馳趨倭乃發當摩兵踰龍田山阿曇連濱子遣兵數十人追之帝設伏悉捕獲之倭直吾子籠素善仲皇子密聚精兵將徼帝望其兵衆懼而歸降帝駐石上神宮既而瑞齒別皇子誅仲皇子來報帝乃還宮遂即位○立皇弟瑞齒別皇子為皇太子○遷

都磐余謂之稚櫻宮

按本書云即位於磐余稚櫻宮蓋誤也

○平群木菟

蘇我滿智物部圓執國膳

○一日帝泛舟宴市磯池膳

臣余磯獻酒櫻花飄落御盞時方盛冬帝異之謂物部

長真膽連曰是花非時而來汝往覓之於是長真膽尋

花得之掖上室山而獻之帝大喜以為宮名○始置史

於諸國記民言事達四方志○始置藏職因定藏部○

帝在位五年崩壽七十太子立是為反正天皇

反正天皇履中帝母弟也生於淡路宮生而駢齒及瑞

井具浴時多遲花飄落井中因名曰多遲比瑞齒別多

遲今虎杖也帝以誅仲皇子為履中帝所寵遂立為太

子至是即位○遷都於河內丹比謂之柴籬宮在位六

年崩壽六十今從古事記群臣議迎雄朝津間稚子宿

禰皇子立之是為允恭天皇

允恭天皇反心帝母弟也初反心帝崩無嗣群臣迎立

帝帝遜讓不許群臣奉璽固請遂即位於遠明日香宮

明日香宮據古事記○帝憂氏姓混亂會諸氏人於味檀丘設探

湯正其詐冒以定氏姓帝憂已下參取古事記○帝寵衣通姬造

宮於河內茅渟處之衣通姬皇后妹也容色絕世光豔

徹衣時人號曰衣通姬從母在近江坂田帝聞而召之

以台色不擇不敢內之宮處之藤原宮至是造宮茅渟

自是數託游獵行幸焉○立木梨輕皇子為皇太子○

帝在位四十二年崩穴穗皇子立是為安康天皇

安康天皇允恭帝第三子也母忍坂大中姬皇后初允

恭帝崩太子木梨輕淫虐滋甚群臣不服屬心於帝太

子懼變密集兵將襲帝慮事不捷匿於物部大前家帝

率兵圍之太子自殺帝遂即位○遷都石上謂之穴穗

宮○帝幸山宮暴崩初帝欲為大泊瀨皇子聘大草香

皇子妹幡梭皇女使根使主致其意大草香大喜因獻

其私寶押木珠縵以為信驗使主愛珠縵私匿之不進

詐奏大草香不肯奉命帝怒遣兵圍其第攻殺之乃取

幡梭為大泊瀨妃又取大草香妃中蒂姬為妃尋立為
皇后后初在大草香家生眉輪王眉輪以母故免罪養
宮中及幸山宮帝謂后曰汝雖親昵朕畏眉輪眉輪時
年七歲七歲據古事記游戲樓下悉聽其言遂登樓伺帝寐刺
而弑之在位三年壽五十六大泊瀨皇子立是為雄略
天皇

雄略天皇允恭帝第五子安康帝同母弟也初生神光
滿殿長而剷健過人安康帝之遭弑大舍人走告變帝
疑諸兄逼八鈞白彥皇子問其所以皇子不答帝拔刀
斬之又問坂合黑彥皇子亦不答帝愈怒黑彥皇子思
與眉輪王止匿於大臣葛城圓宅帝圍其第縱火焚殺
之又殺市邊押磐皇子御馬皇子廼即位於泊瀨朝倉
遂都焉以平群真鳥為大臣大伴室屋物部目為大連
真鳥木菟之子室屋武以之子也○立幡梭皇女為皇
后○始置穴人部帝獵御馬瀨大獲禽顧謂群臣曰獵
場之樂使膳夫割鮮孰與自割左右相視不對帝怒拔
刀斬御者促駕還宮太后憂懼乃使倭采女日媛迎駕
獻酒帝悅日媛携手入後宮白太后曰今日游獵多獲
禽欲與群臣割鮮歷詢群下莫能承意故朕怒之太后
慰之曰群臣不對者不曉帝意爾獵場空置穴人部膳

臣長野善作穴膾請以充之以我為始使群臣貢之可也帝大悅自後臣連伴造相繼而貢遂置穴人部○帝獵葛城山皇后從焉野豬突至帝命舍人逆射刺之舍人怖而避之豬直突將觸帝帝蹈殺之獵罷欲斬舍人后諫曰天下皆謂陛下荒畋以獸故殺人無乃不可乎帝欣然納之與后上車曰獵者獲禽朕獨獲善言而還樂哉衆呼萬歲遂釋舍人○吳國遣使來聘○以吉備田狹為任那國司田狹據任那反初田狹入直禁內盛稱其妻之美帝潛聞而心悅之乃拜田狹為任那國司奪其妻稚媛為妃田狹聞而大怒遂據任那反是時新

羅久不朝貢遣田狹子弟君及吉備海部赤尾討之取道百濟賜書百濟王令獻技工田狹乃使弟君據百濟反弟君妻樟媛知其謀殺弟君遂與赤尾將百濟技工而歸○高麗與新羅通好遣兵一百人戍新羅備百濟新羅誤殺戍兵高麗怒攻新羅新羅乞救於任那日本府任那王請膳斑鳩吉備小梨難波赤日子率兵救之大破高麗軍○新羅久不朝貢帝遣紀小弓蘇我韓子大伴談小鹿火等討之大破之喙地悉定餘衆不降率兵擊之大伴談紀岡前來目力戰而死兩軍交綏紀小弓卒于軍小弓子大磐聞父喪往新羅奪小鹿火兵殺

蘇我韓子據任那○命木工鬪雞御田始起樓閣○先是遣身狹青檜隈博德於吳至是還自吳與吳使及工人漢織吳織縫衣兄媛弟媛共來泊住吉津處其工人於檜隈野以兄媛奉大三輪神以弟媛為漢衣縫部○誅根使主初吳人來聘使使主饗之於石上高拔原帝密使舍人視之舍人還奏使主所着珠纒甚美帝欲觀之命臣連服飾如饗吳使時及引見殿前后見使主珠纒悲泣帝怪問之后曰使主所着珠纒先帝為陛下聘妾時妾兄大草香之所獻也今視之不覺悲泣帝聞大怒詰問之使主首服帝欲誅之使主逃至日根築壘拒

守官軍擊殺之○初難波日香蚊事大草香皇子皇子之遇害也日香蚊與其二子抱持皇子屍呼曰冤哉吾主至此我父子生事之死不殉此不臣也即皆自剄眾為流涕至是求其子孫賜姓大草香部吉士○詔聚秦氏百八十部賜秦酒君秦氏所獻調絹充積朝廷造大藏以藏之置大藏官以酒公為長官造大藏己下姓氏錄○高麗攻陷百濟殺其王及王子立王弟汶洲為王賜久麻那利地○立白髮皇子為皇太子○祀豐受大神於伊勢度會郡山田原初在丹波真井原至是遷祀焉祀己下延曆儀○丹波餘社郡有浦島子者一日乘舟而釣得大龜

化為美女浦島子悅以為婦遂俱入海到蓬萊久之思

疑女知其情告別贈以玉合曰若欲再相見慎勿啓視

焉乃上舟俄頃至浦口訪其舊里邑閭變易並無相識

見一老嫗問之曰傳聞往昔此地有浦島子者一日乘

船而去終不歸來浦島子惘然自失乃閱合視之有紫

氣起於合中俄而變為老翁後不知所終桑略記續浦

島子傳○按釋日本紀註引丹後風土記云丹後與謝

郡伊豫部馬養作文記浦島事馬養持統帝時人也而

水鏡續古事談皇代記並云淳和帝天長二

年浦島子還鄉後人傳會從可知也故不取

紫軍士護送之筑紫安致臣馬飼臣等率舟師擊高麗

文斤卒遣昆文王第二子末多王其國賜以兵器使筑

帝在位二十三年崩壽六十二本書享年關今據

性性好殺百濟采女與石川楯姦使來目部執二人縛手

足於木置假皮上焚死之嘗見木工猪名部真根斲木

以石為質終日揮斧不毀其刃帝異之問曰汝無誤中

石耶答曰不誤乃使采女裸體相撲真根心動誤毀其

刃帝怒其言欺妄欲刑之其徒歎惜作歌諷之帝聞而

赦之晚年頗留心政事國家無事太子立是為清寧天

皇

清寧天皇雄略帝第三子也母葛城韓媛帝生而白髮

故稱白髮皇子長而有愛民之心雄略帝特異重之遂

立為太子雄略帝之崩星川皇子謀不軌據大藏大伴
 室屋與東漢掬討平之率群臣奉璽於帝即位於磐余
 甕粟遂都焉○帝憂無子而名不傳於後命大伴室屋
 置白髮部舍人膳夫鞞負於諸國○立億計王為皇太
 子以弘計王為皇子○遣臣連於諸國巡省風俗○詔
 罷獻犬馬器玩○帝在位五年崩壽四十一

鏡一代要記 弘計王立是為顯宗天皇 本書享年 闕今據水

顯宗天皇初稱弘計王履中帝孫市邊押磐皇子第二
 子也母羨媛初雄略帝殺押磐皇子也皇子帳内日下
 部使主與其子吾田彦奉帝及母兄億計王避難於丹

波余佐郡使主變名田疾來既而懼誅逃入播磨縮見
 山石室自縊死帝不之知與億計王至播磨明石郡為
 忍海部造細見家僮會國司來目部小楯來宴細目家
 時二王執燭在側小楯知其非常人使二王起舞億計
 王起舞既而帝又起歌舞歌中寓以諷詞小楯聞而異
 之更令復唱帝乃自贊曰我是去來穗別天皇子押磐皇
 子之胤也按本書云於市邊宮治天下天萬國押小楯
 大驚避席再拜供奉甚謹還具奏其狀清寧帝大喜曰
 朕無子可以為嗣乃迎入宮中立億計王為太子帝為
 皇子及清寧帝崩太子讓位於帝帝固辭不從於是帝

姊飯豐青皇女臨朝稱制無幾皇女薨太子奉璽勸進
帝辭讓數四乃受之即位於近飛鳥八釣宮○初押磐
皇子之遭害也帝猶幼弱不知其墓及即位召聚父老
親臨歷問有一老嫗知其所於是行幸近江來田綿蚊屋
野改葬焉○始設曲水宴始設據水鏡○召前播磨國司來
目部小楯優詔褒其功因授山官賜姓山部連○紀大
磐據任那通謀高麗志欲并吞三韓乃開府自稱神聖
用任那人左魯那奇他甲肖策殺百濟人適莫爾解於爾林
築帶山城扼東道絕百濟糧道百濟王怒遣領軍古爾
解內頭莫古解等攻帶山城大磐逆擊破之既而兵竭

力屈走歸本邦○帝在位三年崩壽三十八本書享年開今據古

事記水鏡帝久在民間知百姓疾苦及即位留心政事賑卹

貧窮不數年而百姓殷富歲比稔穀斛直銀錢一牛馬

被野太子立是為仁賢天皇

仁賢天皇諱大脚字鳥郎初稱億計王顯宗帝母兄也

清寧帝時立為太子清寧帝崩讓位顯宗帝至是即位

於石上廣高宮○遣難波日鷹於高麗求人日鷹率

工匠而還○立小泊瀨稚鷦鷯尊為皇太子○在位十

一年崩壽五十本書享年開今據水鏡愚管抄初顯宗帝即位怨雄略

帝殺其父欲毀帝陵帝諫曰陛下與億計共蒙先帝之

殊恩以至今日陛下不報其德而發其父之陵無乃不可乎顯宗帝嘉其言乃止帝幼而聰敏仁惠謙恕在位之間吏稱其職民安其業遠近清平戶口蕃殖太子立是為武烈天皇

武烈天皇仁賢帝子也母春日大娘皇后仁賢帝立為太子帝崩大臣平群真鳥專政潛謀篡奪其子鮪又無禮於帝帝與大伴金村謀除之金村將兵誅鮪又圍真鳥第遂誅之即位於泊瀨列城遂都焉在位八年崩帝性殘忍嗜殺剗孕婦觀其胎或解人指甲使掘墓頽又拔人頭髮使之登樹而射墜之以為快其殘虐如此帝

崩無嗣群臣迎立男大迹王是為繼體天皇
繼體天皇初稱男大迹王應神帝五世孫也父彥主人王居近江三尾別業娶三國坂中井人女振媛生帝帝幼孤從母鞠養于越前高向及壯有大度愛士禮賢會武烈帝崩無嗣大連大伴金村定議迎倭彥王王望見儀衛甚嚴大懼逃匿金村更議備法駕迎帝帝據胡牀齊列侍臣儼如帝坐持節使等視其尊嚴意甚嚮之帝猶豫未就道會河內馬飼荒籠潛遣人具告群臣翼戴之意帝意遂決至樟葉宮金村上鏡劍帝辭讓數次乃即位○遷都山背筒城○遣哆唎國司穗積押山于百

濟百濟貢調請任那上哆唎下哆唎娑陀牟婁四縣許
之又遣將軍姐彌文貴洲利即爾從穗積押山來貢五經
博士段揚爾奏伴跋國奪己汶之地召會百濟新羅安
羅伴跋使者下詔以己汶帶沙地賜百濟○立勾大兄
皇子為皇太子○遷都弟國後遷都倭磐余玉穗○使
近江毛野率眾六萬往任那復新羅所侵故地時筑紫
國造磐井叛據火豐二國通謀新羅距毛野遣物部麤
鹿火將兵討之磐井伏誅筑紫悉定○任那王己能末
多干岐來朝訴新羅背約侵掠遣使護送己能末多干
岐又詔近江毛野和解諸蕃毛野綏馭失方遣使召還

之○大臣許勢男入薨○帝疾病傳位太子尋崩在位
二十五年壽八十二太子立是為安間天皇○
安間天皇初稱勾大兄繼體帝庶長子也母妃日子媛
帝器宇寬弘有人君之量○遷都倭勾金橋因為宮號
○百濟朝貢○在位二年崩壽七十檜隈高田皇子立
是為宣化天皇

宣化天皇繼體帝第二子安間帝母弟也初稱檜隈高
田皇子器宇清通不才能矜人安間帝崩無嗣群臣
上鏡劍勸進帝遂即位○遷都檜隈廬入野因為宮號
以蘇我稻目為大臣阿部大麻呂為大夫○大連物部

麤鹿火薨麤鹿火歷事仁賢武烈繼體安間及帝心直
仁勇曉兵事嘗討磐井有功至是薨○新羅冠任那詔
大伴金村遣其子磐狹手彦救任那磐留筑紫以備三
韓狹手彦往鎮任那又救百濟○帝在位四年崩壽七
十三群臣迎立繼體帝皇子是為欽明天皇

欽明天皇繼體帝嫡子也母手白香皇后宣化帝崩無
嗣群臣議迎帝立之○遷都倭磯城島謂之磯城島金
刺宮○高麗百濟新羅任那遣使貢獻○肅慎人漂來
佐渡島北御名部崎○遣膳臣巴提便於百濟巴提便
至百濟一夕宿海濱亡其小兒爾夜大雪旦起尋索見

地有虎蹤隨而認行至巖岫下果有虎跳出見巴提便
張口欲噬巴提便左手捉虎舌右手拔刀刺殺之取其
皮而還○百濟王明遣使獻金銅佛像及幡蓋經論上
表讚述其功德帝欲禮之下群臣議之蘇我稻目奏宜
禮之物部尾輿中臣勝海本書作
兼子誤俱奏不宜禮帝從之
乃賜佛像於稻目稻目捨向原家為寺時諸國大疫久
而愈甚尾輿等奏疾疫之起實由禮佛互速毀佛像以
求後福帝納焉乃命有司投佛像於難波掘江悉火伽
藍○初百濟王伐高麗復其故地取漢城平壤至是新
羅與高麗通謀攻百濟百濟棄漢城平壤新羅入居之

百濟遣使乞救遣內臣名於百濟許遣援兵因賜船馬

弓矢又敕使醫博士易博士曆博士逸番往來○立皇

子濟中倉大珠敷尊為皇太子○百濟又遣使乞救貢

易博士曆博士醫博士樂工帝遣內臣率舟師如百濟

俱伐新羅攻函山城拔之百濟王上表奏捷獻其虜獲

并好錦毼毼及斧三百口○百濟王明為新羅所殺王

子餘昌遣其弟惠來赴遣阿倍臣佐伯連名等發筑紫

舟師護送王子惠又遣筑紫火君率勇士一千送至彌

氏津守其要害○新羅滅任那遣大將軍紀男麻呂副

將河邊瓊岳討新羅新羅起兵距戰男麻呂擊破之已

而瓊岳輕進失利為新羅所虜時調伊企儺亦被執奮

罵不屈見殺其子舅子六抱其父而死人咸傷惋焉○

遣大將軍大伴狹手彥率兵數萬伐高麗大破之高麗

王踰牆而逸狹手彥乘勝入宮悉獲其珍寶而還○大

臣蘇我稻目薨稻目崇奉佛法捨向原家為寺號向原

寺是為佛祠之始○高麗入貢○帝在位三十二年崩

太子立是為敏達天皇

敏達天皇欽明帝第二子也母石姬皇后○物部守屋

為大連蘇我馬子為大臣守屋尾輿之子馬子稻目之

子也○高麗上表用烏羽字跡不辨人莫能讀王辰爾

取其羽蒸以飯甑印之於帛文字盡見始得讀之帝大
 嘆異辰爾其先百濟人初應神帝時遣使百濟求有識
 者王以其孫辰孫王應之隨使入朝大闡儒風辰爾其
 玄孫也初已下續日本紀桓武紀○營宮於譯語田是謂幸玉宮○
 帝以任那未復為憂時火葦北國造阿利斯登子曰羅
 在百濟賢而有勇帝欲召議軍事遣吉備海部羽島徵
 日羅百濟愛其材而不肯遣帝復遣羽島召之百濟遂
 使恩率德爾余怒可奴知參官拖師德率次干德等送
 日羅至帝大喜使大伴糠手子阿部目物部贄子問計日羅
 具陳征討之策帝嘉納焉恩率參官恐其言己國事及

發命德爾余怒殺日羅帝大怒收德爾等下獄鞠問皆
 服罪乃以德爾賜日羅族殺之○蘇我馬子崇信佛法
 脩治佛宇時物部守屋素不喜佛法白帝毀塔宇燔佛
 像棄餘燼于難波掘江又捕馬子所崇信三尼撻之由
 是與馬子有隙其後馬子依病請奉三寶帝雅好文史
 不信佛法謂馬子曰汝獨為之勿惑他人矣○帝在位
 十四年崩大兄皇子立是為用明天皇
 用明天皇初稱大兄皇子欽明帝第四子也母蘇我堅
 鹽媛都于磐余謂之池邊雙槻宮○初敏達帝之崩也
 穴穗部皇子竊懷覬覦及帝即位愈益不平使物部守

屋殺三輪逆逆自敏達帝時寵任用事至是守衛殯宮
皇子欽烝炊屋姬皇后強入殯宮逆拒而不內皇子怒
與守屋率兵圍磐余池邊逆知之潛匿炊屋姬皇后別
宮海石榴市為族人所告皇子復遣守屋遂殺之自是
皇后及馬子俱惡皇子初己下參○帝新嘗於磐余河
上新嘗祭名按類聚國史以清寧帝二年為新嘗始公
事根源以用明帝時為始然仁德紀云是歲當新嘗
之日賜酒名婦据此則新嘗之禮
是時已有之非助于此故不取得病還宮詔群臣曰
朕欲歸三寶卿等議之物部守屋中臣勝海奏佛蕃神
不足敬蘇我馬子贊成詔旨引僧入宮於是守屋馬子
怨隙滋甚守屋聞馬子圖已集兵自守迹見赤檮殺勝

海○帝崩在位二年欽明皇子若雀命立若雀命據是
古事記

為崇峻天皇

崇峻天皇欽明帝第十二子也母蘇我小姊君初用明
帝崩無嗣大連物部守屋欲盡去諸皇子而立穴穗部
皇子託游獵而陰圖作難既而謀泄大臣蘇我馬子奉
炊屋姬皇后詔遣佐伯丹經手土師磐村等夜圍穴穗
部皇子宫兵士登樓擊皇子肩皇子墜地走入旁室乃
舉燭索而殺之又殺宅部皇子又與帝及諸皇子群臣
率兵攻守屋守屋親率子弟及家兵距戰兵勢甚盛諸
皇子軍畏懦不敢進豐聰耳皇子與馬子整兵進攻迹

見赤構射斃守屋守屋軍遂敗炊屋姬皇后與群臣議立帝宮于倉梯○百濟貢調并獻佛舍利及僧慧聰等九人寺工鑪盤工瓦工畫工○始造法興寺後改號元興寺後改己下拾芥抄○帝欲復任那以紀男麻呂巨勢比良夫大伴嚙等為大將軍率兵二萬屯筑紫遣吉士磐金於新羅吉士木蓮子於任那○帝暴崩初蘇我馬子專橫日甚帝意不平一日密謂豐聰耳皇子曰馬子外好矯飾內懷姦心何以處之皇子曰陛下盍小忍焉馬子專橫如斷此猪也因備兵仗馬子聞而懼乃使東漢直駒弒

帝在位五年群臣議立炊屋姬皇后是為推古天皇推古天皇欽明帝女用明帝妹也為敏達帝皇后至是群臣請皇后踐阼乃即位於豐浦宮○立豐聰耳皇子為皇太子攝行萬機太子用明皇子母穴穗部間人皇后皇后懷妊偶出巡視宮省至厩戶而生太子因名厩戶生而穎敏及壯博學多通兼精釋典至是立為儲貳○創四天王寺於難波荒陵帝信佛法詔太子及蘇我馬子興隆佛法於是群臣競造佛寺○高麗僧慧慈百濟僧慧聰來大弘佛教及法興寺成以二僧處之○新羅貢孔雀一隻○百濟貢駱駝驢羊白雉○新羅與任

皇朝史略 卷二
那戰帝命境部臣穗積臣將兵萬餘擊新羅大破之拔其五城新羅歸其侵地乞降帝遣使二國檢問其狀於是二國寢兵因召還諸將比還新羅復侵任那○命來目皇子率兵二萬五千討新羅皇子至筑紫疾不果行○百濟僧觀勒來貢曆及天文地理遁甲方術等書敕選書生受業○來目皇子薨於筑紫○帝徙御小墾田宮太子請帝造大楯及鞞又畫于旗幟始定冠位大德小德大仁小仁大禮小禮大信小信大義小義大智小智凡十二階並以當色純縫之頂振總如囊而有緣唯元會著髻華○十二年甲子春正月戊戌朔始用曆日

始用已下據政事要略引古傳

賜冠位於諸臣各有差○夏四月太子

定憲法十七條○秋九月改制朝禮○十三年夏四月

始造銅繡丈六佛像各一以鞞作鳥為佛工高麗王大

興聞之獻黃金三百兩○秋閏七月太子命諸王諸臣

著褶○十五年春二月定壬生部○秋七月遣大禮小

野妹子於隋遺隋主書其略曰日出處天子致書日沒

處天子無恙

遺書以下隋書善隣國寶記

隋人稱妹子曰蘇因高○

十六年夏四月妹子還自隋隋使裴世清來報聘○秋

九月世清歸隋復以妹子為大使難波雄成為小使學

生高向玄理學問僧南淵請安及僧旻等

按本書旻為日文據舒明

紀四年僧曼還自唐則寫字者訛為二字可知故今訂之從之○十七年秋九月妹

子還自隋○十八年春三月高麗貢僧曇徵法定曇徵

通五經善畫造紙墨礪磴○冬十月新羅任那入貢○

十九年百濟人味摩之歸化味摩之學于吳傳伎樂舞

乃處之櫻井令少年習之○二十二年夏六月遣犬上

御田田欽矢田部造於隋矢田部造名關○二十三年秋九月御

田欽還自隋百濟入貢○二十五年始造大安寺二十五年

已下元○二十六年秋八月高麗朝貢因獻隋俘及駱

駝器械○二十八年秋八月掖玖人漂泊伊豆島○是

歲太子與大臣蘇我馬子議擬天皇紀及臣連伴造國

造等本紀○二十九年春二月皇太子薨謚曰聖德謚

神皇正統記○三十一年秋七月新羅復擊任那取之使大

德境部雄麻呂小德中臣國等將兵討之新羅恐怖請

罪釋之○三十二年夏四月始置僧正僧都檢校僧尼

以百濟僧觀勒為僧正鞍作部德積為僧都○三十四

年夏五月大臣蘇我馬子薨馬子性陰狡有才略性陰狡

水鏡以外戚久擅朝權外戚已下初馬子使東漢駒弒崇

峻帝群臣畏馬子不敢收之馬子寵駒甚至令出入卧

内駒遂姦馬子女馬子聞之大怒捕駒縛之於木親射

之數其行弒逆駒大叫曰我知有大臣不知有帝也馬

皇朝通志

子愈怒挺劍斬殺之世以此益惡其姦云初己下○六

月雪○是歲以蘇我蝦夷為大臣

外史氏曰神武已後相傳二十餘世未有女主臨

朝者神功雖稱制終不即真而女主即真自推

古始也厥後皇極持統相繼即位甚至聖武以

孝謙為儲貳蓋由帝之作備也當是之時蘇我

馬子專權欲其易制故立己出以成固龍保位之計

卒馴致蝦夷父子僭逆之端嗟乎神功臨朝而懸

象失光推古在位而盛夏飛雪陰氣之盛其應如

此孰謂天道悠遠不關人事乎

○三十六年春三月帝崩壽七十五遺詔立田村皇子

是為舒明天皇

舒明天皇敏達帝孫押坂彥人大兄之子也初稱田村

皇子母糠手姬皇女推古帝崩遺詔帝嗣位時山背王

亦以為受旨於是大臣蘇我蝦夷大會群臣議定所立

群臣以遺詔故皆欲立帝唯境部摩理勢等固欲立山

背王群議久不決蝦夷遂殺摩理勢定策立帝○二年

春三月高麗百濟並朝貢○秋八月遣大仁犬上御田

歛藥師慧日於唐○冬十月移宮于飛鳥岡謂之岡本

宮○三年春三月百濟王璋納其子豐為質按本書云百濟王義

慈納王子豐璋為質然據東國通鑑是歲武王璋立三十二年也義慈立舒明帝十三年則本書之誤可知也又按唐書及三國史記東國通鑑皆作豐本書舒明紀中或作豐今從之○四年秋八月

犬上御田歙還自唐唐使高表仁報聘留學僧旻等從之○九年蝦夷反大仁上毛野形名為將軍討平之○

十二年冬十月新羅百濟朝貢遣唐學生高向玄理學問僧請安從新羅使而還○始定斗升斤兩始定已下扶桑略記

一代要記○十三年冬十月帝崩皇后立是為皇極天皇皇極天皇初稱寶皇女押坂大兄皇子孫茅渟王之女也初適高向王後為舒明帝皇后帝崩明年正月即位

時蝦夷子入鹿自專國政威權過父○百濟弔喪使來

○二月高麗貢獻○詔遣津守大海於高麗國勝水雞於百濟草壁真跡於新羅坂本長兄於任那○三月新

羅賀登極使及弔喪使來○秋八月先是亢旱彌月大臣蝦夷以百姓大雩無應聚僧大寺讀經祈雨無驗至

是帝行幸南淵河上跪拜四方仰天而祈雷雨忽至遂雨五日遍于郡國百姓呼萬歲稱曰至德天皇○蝦夷

僭逆滋甚建祖廟於葛城高宮而為八佾舞又興大役豫營父子壽藏名曰大陵小陵○二年夏四月遷居於

飛鳥板蓋宮○冬十月大臣蝦夷因疾不朝私授紫冠於入鹿以擬大臣入鹿潛謀立古人大兄皇子皇子舒

明帝子蘇我氏之出也故入鹿欲立之時山背大兄王

素有威望入鹿深忌之時已下十一月入鹿遂遣巨勢

德太古土師猪手襲大兄王於斑鳩王及子弟妃妾自

經而死○三年春正月以中臣鎌足為神祇伯固辭不

就鎌足小德冠御食子之子也小德已下系圖○按大

陸人大織冠傳曰和州博涉書傳器宇宏遠智略絕人

博涉已下及是稱疾退居三島時入鹿專橫圖危國家

鎌足慨然有匡濟之志竊察宗室諸王可輔以濟功者

屬心中大兄皇子然不得通情一日陪皇子蹴鞠於法

興寺槻樹下皇子鞋偶脫鎌足跪奉之皇子亦跪受之

由是情好日密然恐數會人生嫌疑託學周孔之道於

南淵先生按本書推古帝十六年遣小野妹子於唐學

自唐據此則南淵每相往來密謀于路鎌足乃勸皇子

與蘇我石川麻呂結昏以為援又薦佐伯子麻呂葛城

稚犬養網田○冬十一月蘇我入鹿雙起第宅於甘檮

岳稱蝦夷宅曰宮門己宅曰谷宮門稱其子曰王子構

柵門於宅外傍造兵庫常使兵士警衛時蝦夷又造宅

於畝傍山東築城環池每出入從兵士數十其僭擬如

此○四年夏六月三韓入貢中大兄謂石川麻呂曰三

韓進調之日卿當讀表吾欲入誅入鹿石川麻呂諾及

皇朝通志 卷二
期帝御大極殿入鹿入侍入鹿為人多疑劍不去身鎌足使俳優調之入鹿乃解劍而入便戒衛門府閉諸門中大兄親執長槍立於殿側鎌足持弓矢警衛石川麻呂讀表文將盡鎌足促子麻呂子麻呂畏縮不發石川麻呂手戰聲顫流汗沾背入鹿怪問之石川麻呂曰天威咫尺不覺乃爾中大兄恐其失機徑入斫入鹿子麻呂等繼進遂斬殺之中大兄又遣巨勢德太古誅蝦夷事平帝傳位於輕皇子是為孝德天皇

孝德天皇初稱輕皇子皇極帝母弟也皇極帝四年六月傳位於帝帝讓古人大兄皇子皇子固辭入法興寺

為僧帝遂即位尊皇極帝曰皇祖母尊立中大兄皇子為皇太子以阿陪倉梯麻呂為左大臣藤我石川麻呂為右大臣中臣鎌足為內臣置左右大臣及內臣始此

置已下公卿補任曆運記以高向玄理僧是為博士○始改元曰大

化年有號始此年號始此據日本紀○大化元年秋七

月高麗新羅入貢百濟使佐平緣福朝貢兼領任那調使巨勢德太古宣詔責百濟使却還貢物遣三輪粟隈

東人馬飼造名觀察任那國界○八月設鍾匱於朝詔

曰有所訴而尊長不達者納牒于匱冤枉者得撞鍾以訴○九月古人皇子謀反伏誅○遣使諸國錄戶口詔

禁百姓私賣地以杜兼并之路百姓大悅○冬十二月
 遷都于難波長柄豐崎○二年春正月宣詔下新令其
 一罷前代所置子代之民處處屯倉及臣連伴造國造
 村首所有部曲田莊大夫以上賜食封官人百姓賜布
 帛各有等級其二新定畿內國界修京師置國司郡司
 郡分大中小置大領小領主政主帳其三造戶籍制班
 田收授之法定田畝其四罷舊賦役行租庸調之法○
 遣使郡國修兵庫○二月高麗百濟任那新羅朝貢○
 秋八月下詔諭新設百官悉改舊職之意于臣連伴造
 國造○九月遣小德高向玄理本書作黑麻呂註曰黑
麻呂更名玄理按玄理

猶曰黑麻呂訓讀
相通非更名也於新羅徵質遂罷任那調按扶桑略
記皇代

並云是歲始造宇治橋與
續紀所載不合故不取○三年春正月高麗新羅朝

貢○是歲帝徙御小郡宮新制禮法定百官朝參時刻
 制七色十三階冠工人大山位倭漢荒田井比羅夫穿
 溝瀆通難波督役失方百姓疲勞有上疏諫者詔即日
 罷役造淳足柵置柵戶○四年夏四月罷古冠○是歲
 治磐船柵備蝦夷選越信濃民始置柵戶○五年春二
 月改制冠十九階置八省百官○三月左大臣阿陪倉
 梯麻呂薨○殺右大臣藤我倉山田石川麻呂石川麻
 呂馬子孫倉麻呂之子馬子孫已
下系圖誅入鹿有功帝寵異任

皇朝史略 卷二
右大臣賜以金策至是其弟日向譖之太子太子信之
遂奏于帝帝乃遣兵圍其第石川麻呂逃入山田寺自
殺既而太子籍其家得其所自記始悟其冤遂貶日向
為太宰帥

外史氏曰石川麻呂與藤原鎌足誅入鹿有大功於
王室有罪猶宥之况其無罪乎而一旦信讒戮及
無辜帝之於石川麻呂何其慘礫少恩也既悟日
向之讒互肆諸市朝以正刑憲而罪僅止貶竄帝
於是乎失刑也

○夏四月以小紫巨勢德太古為左大臣小紫大伴長

德為右大臣並授大紫○白雉元年春二月穴戶國司

草壁醜經獻白雉因詔改元○夏四月新羅朝貢○二

年夏六月百濟朝貢○秋七月右大臣大伴長德薨秋

月己下公○冬十二月帝徙御豐崎宮謂之難波長柄

豐崎宮○三年夏四月新羅百濟朝貢○四年夏五月

以小山上吉士長丹為遣唐大使小乙上吉士駒為副

使又以大山下高田根麻呂為大使小乙上掃守小麻

呂為副使○六月百濟新羅朝貢○秋七月遣唐使高

田根麻呂至薩麻竹島之間合船漂沒唯門部金等五

人得免○是歲皇太子奏請遷于倭京不許太子奉皇

祖母尊皇后率皇弟移居倭飛鳥河邊行宮公卿百官皆從帝驚懼欲遜位造宮於山碕○五年春二月以大錦上高向玄理為遣唐押使小錦下河邊麻呂為大使大山下藥師慧日為副使○夏四月吐火羅國男女各二人舍衛國女一人漂泊日向○秋七月遣唐使吉士長丹等與百濟新羅送使共歸獻書藉寶貨○冬十月帝崩在位十年帝天資柔仁用意治道訪求民瘼罷國造置國司郡司畫國界定田制至是國家制度始定矣皇極帝再踐祚是為齊明天皇夏四月尚書卿貢○二齊明天皇初禪位於孝德帝上尊號曰皇祖母尊及孝

德帝崩再臨萬機○元年春正月即位於飛鳥板蓋宮○秋八月河邊麻呂等還自唐○冬板蓋宮災徙御飛鳥川原宮○是歲三韓朝貢○二年改卜宮地於飛鳥冑本新羅百濟朝貢因募其地以饗之遂起宮闕號曰後飛鳥冑本宮又起觀於田身嶺上兩槻樹上周以墻垣號曰兩槻宮又造吉野宮百濟獻鸚鵡一隻岡本宮災○三年秋七月設孟蘭盆會於飛鳥寺西○吐火羅人漂泊筑紫逸驛召之○四年春正月左大臣大紫巨勢德太古薨○夏四月越國守阿陪比羅夫率舟師一百八十艘伐蝦夷降之置郡領於濇代津輕二郡而

歸○冬十一月有間皇子謀反伏誅有間孝德皇子性頗狡黠先是詭稱有疾浴牟婁温湯及歸盛稱其風土之美帝欲往觀至是遂幸牟婁嶺我赤兄留守一日赤兄舉時政三失以語有間有間喜以為赤兄黨已乃詣其家密謀舉事所倚案脚無故自折以為不祥俱盟而止爾夜赤兄命物部朴井鮪圍其第馳使以聞遂執有間及其黨與送行在乃絞之藤白坂其黨與伏誅○是歲阿陪比羅夫伐肅慎獻羆二羆皮七十張僧智瑜造指南車○五年春三月吐火羅舍衛國人来○阿陪比羅夫率舟師一百八十艘討蝦夷置郡領於後方羊蹄而歸○秋七月遣小錦下坂合部石布等於唐將蝦夷男女二人示唐主○六年春二月遣阿陪比羅夫率舟師二百艘伐肅慎○夏五月高麗朝貢○阿陪比羅夫獻虜俘五十餘人○秋九月百濟遣使奏新羅借唐兵滅己國佐平鬼室福信與新羅戰圖恢復○冬十月鬼室福信遣使獻唐俘一百餘人乞救且請迎王子餘豐以為國主詔許之○十二月將遣兵救百濟於是行幸難波宮簡閱軍器敕駿河造船○七年春正月親帥舟師赴筑紫三月進至娜大津居磐瀨行宮○夏五月帝伐朝倉社樹造橘廣庭宮徙居之社神作崇宮中數有

妖怪侍臣多死○耽羅始遣王子阿波伎來貢○秋七月帝崩于朝倉宮在位前後凡十一年帝好土功屢興大役嘗使水工穿渠自香山西至石上山以船二百隻運石上山石於宮東山疊以為垣材木朽腐委積山椒費用不貲庶怨嗟云太子立是為天智天皇

皇朝史略卷之二終

皇朝史略卷之三

天智天皇初稱葛城皇子一名中大兄舒明帝嫡子皇極帝所生也帝既誅入鹿有功皇極帝欲傳位於帝帝從中臣鎌足之言密奏讓孝德帝皇極帝嘉之遂禪位於孝德帝立帝為皇太子匡輔朝政齊明帝再祚仍為皇太子及齊明帝崩於朝倉行宮素服稱制奉梓宮還難波○壬戌夏六月百濟貢調○癸亥秋八月新羅滅百濟初帝使大山下狹井檳榔小山下朴市秦田來津

皇朝史略卷之三

帥兵五千餘護送百濟王子豐及其叔父忠勝等忠勝本

書俾歸國又使大將軍阿曇比羅夫等率舟師一百艘

救之立豐為王既而豐疑福信有貳收殺之新羅聞豐

殺福信來圍州柔唐將劉仁軌劉仁軌據唐書列船于

白村江唐書作白江口我軍與唐兵戰敗績朴市秦田來津死

之豐奔高麗百濟遂滅諸將班師甲子春二月改冠

位號增為二十六階定氏上民部家部之制是歲置防

烽於對馬島筑紫等國乙丑秋九月唐使沂州司馬

劉德高等來聘是歲遣小錦守大石小山境部石積等

於唐丙寅春正月高麗貢調是冬僧智由獻指南車

○丁卯春三月遷都近江滋賀滋賀據代要記謂之大津宮

○冬十一月大山下境部石積等歸自唐是月築城于

倭高安讚吉屋島對馬島金田元年戊辰春正月帝

即位本書註一說曰六年春三月即位按本書以壬戌

皇崩是則以即帝性至孝殯先帝六年至是登祚帝性

愚管抄一夏四月百濟入貢按唐書云豐走不知所

代要記遣人請命諸城皆復常陸國獻白雉及角馬

衆及倭人請命諸城皆復也○常陸國獻白雉及角馬常

據此則遣使者蓋忠勝也○秋七月高麗新羅朝貢講武近江多置牧

桑略下扶○放馬越國獻然土然水○冬十月唐滅高麗初高麗

仲牟王按仲牟朱蒙也建國時言傳國千歲矣其母曰善治之

則可庶幾也若不得千歲但當有七百年也至是竟如其言云○是歲新羅僧道行盜草薙劔將奔其國遇風兩晦冥不能進而歸○二年春三月耽羅王遣其子父麻伎貢獻○秋九月新羅朝貢○冬十月車駕臨中臣鎌足第問病尋遣大海人皇子就鎌足第賜姓藤原授大織冠為內大臣是月鎌足薨鎌足為人忠亮知莫不言制禮儀定律令皆出其手制以下大織冠傳及薨帝尤悼惜臨第宣詔賜賻○是歲遣小錦中河內鯨等於唐徙百濟佐平餘自信佐平鬼室集斯等男女七百餘口於近江蒲生郡唐使郭勢宗等來○三年春正月制朝廷禮

儀及行路相避之禮○二月造戶籍紀斷盜賊浮浪○築長門及筑紫城○夏六月有人得龜背書申字上黃下玄長六寸許○是歲造水碓治鐵○四年春正月以大友皇子為太政大臣蘇我赤兄為左大臣中臣金為右大臣蘇我果安巨勢人紀大人為御史大夫置太政大臣御史大夫始此卿置以下公卿補任○頒冠位法度○高麗朝貢按東國通鑑高麗已亡新羅私封高安勝為高麗王其稱高麗朝貢者蓋是也○唐百濟鎮將劉仁願遣李守真等上表○授百濟佐平餘自信沙宅紹明等五十餘人位各有差○二月百濟朝貢○常陸獻侏儒長一尺六寸○夏四月始置漏刻擊鍾鼓

以警時帝為太子時親製漏刻至是置之新臺○六月

百濟新羅朝貢○秋九月帝不豫○冬十月帝彌留召

大海人皇子屬以後事皇子稱疾固辭請為僧許之即

日剃髮敕賜袈裟皇子遂入吉野立大友皇子為皇太

子據扶桑略記水鏡○十一月太宰府言唐使郭務悰

等至比智島○左大臣蘇我赤兄等五人奉皇太子盟

帝前○十二月帝崩在位四年稱制者六年凡十年年

四十六本書享年闕今據舒明紀年十六之文推之葬山背山山科陵葬已下

或曰帝騎馬至山科入林中莫知所之後獲遺履瘞之

即就起陵云或曰以下扶桑略記水鏡○按日本紀於天智天武紀多隱諱之言事實難得而考

然據略記水鏡則帝之崩蓋有非常之變而舊史所不載事實曖昧今不可得而考姑附備考帝嘗作

行宮於筑前上座郡朝倉林木不斷務從質樸時人號

曰木丸殿帝為之歌後世傳為歌曲十訓抄帝好學能文

明習治體興學校制典禮憲章文物粲然可觀規摹宏

遠振古未有云懷風藻序後置十陵隨世數遞除三代實錄以帝

為中興之祖百世不除焉云神皇正統記

外史氏曰帝以不世出之姿誅逆臣平國難救社

稷之將顛創學校制禮儀垂典刑於將來觀其任用

鎌足終始不疑君臣遭遇雖漢昭烈之於諸葛亮蔑

以過也武能戡亂文能致治自非英明之主安能臻

大皇太子
二年七月
廿五日

此哉後世以帝為中興之祖良有以也

皇太子立是為天皇大友

天皇大友天智帝長子也母伊賀采女宅子娘長子據

初稱伊賀皇子為人魁岸奇偉眼光射人唐使劉德高

見而異之曰皇子風骨非常不似世間人為人已下

智帝大漸立帝為皇太子至是即位大漸已下扶○元

年壬申春三月遣內小七位阿曇稻敷於筑紫告國喪

於唐使郭務悰務悰等喪服舉哀獻書函信物○夏五

月高麗朝貢○六月大海人皇子稱兵于吉野遣其將

村國男依和珥部君手等於美濃差發兵眾使大分惠

尺等乞驛鈴於倭留守司高坂王高坂王不聽於是皇

子東行使伊勢國司三宅石牀等率兵五百塞鈴鹿山

道京師大震帝召羣臣會議或進策曰急發驍騎追躡

其後若稽緩則失事機矣帝不聽

外史氏曰古人有言兵聞拙速不聞巧遲當是時吉

野兵未集人心未附急發驍騎以罷其後未必不得

尅也而及大兵已集人心已屬欲一舉而滅之可謂

失策矣蓋帝有英才而無雄略此其所以終取敗

亡也歟

乃遣韋那磐歛書藥忍坂大麻呂于東國總積百足物

部日向于倭京佐伯男于筑紫樟磐手于吉備國發兵
磐鍬至不破藥大麻呂爲伏兵所虜磐鍬逃歸倭留守
司高坂王與百足等陣于飛鳥寺西百足爲吉野將大
伴吹負所誘殺日向等亦被擒高坂王出降秋七月吉
野將坂本財陷高安城壹岐韓國分軍自大津丹比二
道進攻財于高安城財等進兵渡衛我河韓國戰于河
西破之河內國司來目鹽籠謀應不破軍潛集兵衆韓
國覺之鹽籠聞事泄自殺時山部王蘇我果安巨勢人
將兵數萬軍于犬上川欲進嚴不破山部王爲果安人
所殺軍亂不進果安自殺將軍羽田八國其子大人以

其族降于吉野將軍大野果安擊大伴吹負于乃樂山
大破之追至八田疑有伏而退境部藥與村國男依戰
于息長橫河兵敗死之秦友足與男依戰于鳥籠山死
之壹岐韓國與吹負戰于葦池上不利吹負更陪兵三
道並進大養五十君爲中道將屯村屋上道軍屯著陵
五十君使別將廬井鯨率精兵二百衝吹負營營堅不
可犯鯨不得進既而吉野將三輪高市麻呂置始菟大
破上道軍于著陵進斷鯨軍後兵士驚潰死傷無算鯨
僅以身免村國男依攻破粟太軍進薄瀨田帝悉衆軍
橋西旗幟蔽野鉦鼓震天將軍智尊率精銳爲先鋒撤

橋板三丈置一長版繫索設機列弩亂發矢下如雨弩列

已下扶桑略記吉野兵不敢進オホキク大分稚臣ワカオ棄矛提刀蹈版疾度

冒矢以進眾兵繼進守橋兵悉亂智尊怒斬退者不能

禁也智尊戰死我軍遂敗犬養五十君ハザラシホテ谷鹽手與村國

男依戰于粟津市敗死左右大臣群臣皆逃唯物部麻

呂一二舍人從帝崩于山前時年二十五初帝夢有朱

衣老翁捧日授帝有人從腋下出奪去已覺驚異語藤

原鎌足鎌足歎曰聖朝萬歲之後恐有巨猾伺隙乎然

臣聞天道無親唯善是輔大王自脩德災異不足憂也

臣有女願納掖庭奉巾櫛帝聽之至是果不終矣帝性

明悟好學善詩廣延文學之士以為師友嘗侍宴獻詩

曰皇明光日月帝德載天地三才並泰昌萬國表臣義

述懷曰道德承天訓鹽梅寄真宰羞無監撫術安能臨

四海時年已下其文藻精絕如此大海人皇子立是為

天武天皇

天武天皇幼名大海人天智帝母弟也生而岐嶷及壯

英武曉天文遁甲天智帝四年削髮赴吉野時人為之

語曰所謂翼虎放之也帝大友元年五月朴井雄君來

告曰朝廷敕美濃尾張國司差山陵役夫令各執兵臣

以為非唯為山陵必有事矣若不早圖噬臍無及也又

有人告曰近江京至倭京多置斥候命菟道守橋者遮留吉野舍人運私糧者帝令人廉之果然乃怒曰吾之所以遁世者本圖全身事勢既急吾豈坐取亡乎六月遣村國男依和珥部君手身毛廣往諭美濃國司先命安八磨郡湯沐令多品治發本郡兵急塞不破道帝將赴東國或諫曰近江群臣畜謀已久聞我東行則所在必起相謀然今欲徒手而東臣恐道路梗澁事且不測帝從之欲召還男依等乃遣大分惠尺黃書大伴逢志摩乞驛鈴於倭留守司高坂王惠尺直至近江召高市大津二皇子會帝於伊勢已而高坂王不與鈴志摩歸

報帝乃與正妃鸕野皇女草壁皇子忍壁皇子及朴井雄君縣犬養等二十餘人赴東國時事出倉卒不遑待車馬步而出及途遇縣犬養大伴始得騎馬比過津振川車馬亦追至夜渡橫河有黑雲竟天廣十餘丈帝舉燭親秉式占曰此天下兩分之象也然我終得之乎進至伊賀郡郡司等率兵來歸經荊菝野赴積殖山口高市皇子率民大火赤染德足等來會進經大山至伊勢鈴鹿國司守三宅石牀介三輪子首湯沐令田中足麻呂等來會發兵五百塞鈴鹿山道至朝明郡迹太川上望拜伊勢大神大津皇子率大分惠尺等來會村國男

依亦來報發兵三千塞不破道帝褒之命高市皇子監其軍事帝大友遣書藥忍坂大麻呂等徵東國兵藥等至不破高市皇子伏兵虜之帝入不破尾張國司小子部鉏鉤率衆二萬來歸帝大喜分遣其兵守諸道進至野上高市皇子來迎帝撫背褒慰命總統軍事造行宮于野上其夜大雷雨帝祈曰神祇祐我則雷雨息矣言訖即息帝如和暫視軍大伴吹負與倭京留守司坂上熊毛及漢直等謀奪飛鳥寺營殺其將穗積百足擒穗積五百枝物部日向招降留守司高坂王稚狹王遣大伴安麻呂等來報帝大悅即就拜吹負為將軍三輪高市

麻呂賀茂蝦夷及諸豪傑相率歸吹負七月吹負欲襲近江赴乃樂分遣裨將守龍田大坂石十三道坂本財赴龍田次平石野近江兵在高安城望風而遁帝遣紀阿閉麻呂多品治等將兵數萬自伊勢大山赴倭村國男依書根麻呂將兵數萬自不破向近江衆皆以赤為幟別命多品治率兵三千屯荊菽野田中足麻呂守倉歷道近江將山部王蘇我果安巨勢人將兵數萬陣于犬上川軍自潰而逃羽田八國以族來降帝授斧鉞為將軍北入越吹負與大野果安戰于乃樂山敗走近江別將田邊小隅夜襲倉歷田中足麻呂棄營脫走小隅

又襲荊菽野多品治逆擊走之村國男依與近江軍戰于息長橫河破之斬其將境部藥東道將軍紀阿閉麻呂等聞吹負敗遣置始菟赴援遇吹負于墨坂進屯金網井軍復振與壹岐韓國戰于葦池上破走之吹負分軍三道並進親當中道近江別將廬井鯨率兵來犯吹負兵連射鯨不得進會上道將三輪高市麻呂置始菟大破近江軍于箸陵乘勝斷鯨軍後鯨潰走倭地盡定諸將進至瀨田遂破近江軍帝大友退至山前自縊焉諸將至不破奏捷八月命高市皇子議近江群臣罪右大臣中臣金處斬御史大夫巨勢人并其子孫及蘇我

果安子悉配流按扶桑略記水鏡曰是歲八月筑紫

改元曰白鳳然本書所載今不取姑附備攷元年春二月即位於飛鳥淨

見原宮○夏閏六月耽羅王遣子久麻伎朝貢新羅遣

使賀登極○秋七月始置不破關秋七月己十一代要記帝王編年記○

八月高麗入貢○二年春三月對馬始貢白金○三年

春正月始起占星臺○夏四月遣小紫美濃王佐伯廣

足於龍田立野始祭風神○四年秋九月為新嘗卜定

國郡齋忌則尾張山田郡次則丹波訶沙郡並食本書註齋

忌此云踰既次此云須岐按大嘗始見清寧紀悠紀修

基之制始見于此古者新嘗大嘗並稱令已後其制始

定中右記以此為大嘗之始○冬十一月乙丑以新嘗

事不告朔○五年春正月庚辰射于南門十七日大射

始此十七日已下據師元年中行事○七年春二月高麗入貢○冬十

月新羅入貢○十一月始置龍田山大坂山二關築羅

城於難波○八年夏五月高麗入貢○冬十一月新羅

入貢○九年春正月詔畿內及諸國繕修天社地社○

二月詔定律令○立草壁皇子為皇太子○三月詔川

島皇子忍壁皇子大錦下上毛野三千等撰帝紀及上

古以來事○夏四月定親王至庶人服色制度○秋七月

遣使新羅高麗○冬十月新羅入貢○詔大山以下小

建以上各上意見○十年春三月敕境部石積等造新

字四十四卷○夏四月詔令男女始結髮○六月男女

始結髮仍著漆紗冠○秋九月敕停跪禮匍匐禮用難

波朝廷之立禮○十一年春二月詔大津皇子始聽朝

政○夏四月詔罷銀錢用銅錢尋詔復銀錢○秋八月

大伴吹負卒吹負咋之子咋子續日本紀智畧絕人帝之在吉

野吹負竊察有時變稱疾居倭及帝起兵率眾屬之數

立奇功指麾英俊咸得其宜帝之得天下其功居多卒

贈大錦中○冬十二月遣使巡行天下定諸國疆域○

十二年春二月遣淨廣肆廣瀨王小錦中伴安麻呂等

於畿內三野王小錦下采女筑羅等於信濃相建都之

地○三月車駕巡幸京師定宮地○夏閏四月詔令文武官務習軍事具兵馬器械有馬者為騎士無馬者為步卒以時檢閱馬○冬十月詔改天下諸氏族姓定為八等○遣伊勢王等定諸國疆域○遣使耽羅○十三年春正月改爵位制增階級諸王以上十二階諸臣四十八階○秋九月遣使於東山山陽山陰南海諸國巡省風俗察國司郡司治狀○朱鳥元年夏五月帝不豫○六月卜帝疾草薙劍為祟因還納之熱田社○秋九月帝崩在位十四年帝嘗制五節舞後世傳之帝嘗已下據續

日本紀天平十五年詔文皇后立是為持統天皇

持統天皇小字鸕野讚良天智帝第三女也母遠智娘為天武帝妃生皇太子草壁深沉有大度帝之稱兵也常從行間與定謀議帝即位立為皇后至是臨朝稱制○大津皇子謀反伏誅大津容貌魁岸音辭俊朗為天智帝所鍾愛幼而好學善屬文性放蕩不羈屏身下士人多歸之時有新羅僧行心通天文卜筮相大津曰皇子骨法非常久居下位難全身因勸作逆由是竊懷異志初而已下至是遂謀反事覺皇后乃使人收之賜死懷風藻譯田驛舍大津臨刑賦詩曰金烏臨西舍鼓聲催短命泉路無賓主此夕誰家向人惜其才學云臨刑已下○

丁亥春正月遣直廣肆田中法麻呂追大貳守刈田等

於新羅赴國喪○秋九月設國忌齋於京師諸寺置國

忌始此扶置國忌已下○戊子秋八月耽羅貢獻○已丑

春正月乙卯大學寮獻杖八十枚卯杖始此卯杖已下

公事○夏四月皇太子薨○新羅遣使弔國喪敕責其

無禮却其貢獻○秋七月詔左右京職及諸國司築射

場○閏八月詔諸國司黜其民四分之一講習武事○

元年庚寅春正月皇后即位帝稱制四年至是登阼

書以稱制之明年為元年與天智紀同書法而本史於

七月以高市皇子為太政大臣按帝以高市皇子為太

以政故本書書其薨曰後皇子尊不書其名天智帝以

大友皇子為太政大臣其後高市皇子為之皆以儲貳

任之而後世以人臣多治比島為右大臣島宣化帝玄

孫多治比古王之子多治比古王○冬十月先是新羅

遣使護送遣唐學問僧及大伴部博麻博麻筑紫人齊

明帝十七年從軍赴百濟為唐兵所執在異域三十年

備嘗艱苦輸忠於朝至是帝嘉其節授位務大肆○令

高市皇子率百官相藤原宮地○十一月始行元嘉曆

儀鳳曆○十二月行幸藤原相宮地○三年春三月行

幸伊勢中納言三輪高市麻呂上表諫遠幸妨農時不

聽高市麻呂詣闕免冠極諫帝竟不納○冬十一月新羅入貢○四年春正月詔令天下百姓著黃衣奴皂衣○三月詔令天下勸植桑紵梨栗蕪菁冬十二月遣陣法博士等講武諸國○五年春三月置鑄錢司○冬十二月遷居藤原宮○六年春三月新羅王遣其子良琳貢獻○七年春正月丙午漢人奏蹈歌十六日蹈歌始此十六日已下水鏡○秋七月太政大臣高市皇子薨○八年春二月立皇孫珂瑠為皇太子八年已下據釋日本紀引王子枝別記初高市皇子之薨也帝會百官議建儲衆議紛紛久而不決葛野皇子進曰開國已來子孫相承以登帝位若

兄弟相及則亂由此興仰察天心焉得能測推之人事

聖嗣自定誰敢問然時予削皇子欲有言葛野叱之乃

止帝嘉之懷風藻至是遂立皇孫續日本紀葛野帝大友之子

也懷風藻○秋八月帝禪位於皇太子在位八年稱制者

四年凡十二年皇太子立是為文武天皇○三

文武天皇小名珂瑠釋日本紀引王子枝別記皇太子草壁子元明

帝所生也持統帝八年立為皇太子是年八月受禪即

位因改元○冬十月新羅入貢○二年夏五月敕太宰

府繕治大野基肆鞠池三城○秋七月禁博戲游手之

徒○定朝儀○三年夏五月流役小角於伊豆島小角

大和人性敏悟通釋典善咒術年三十二棄家入葛木

山絕粒食大和以下扶桑畧韓國廣足師事之後害其

能誣以妖妄惑眾至是竟見配流○秋七月多禰夜久

菴美度感人來貢方物度感鳥始通○冬十二月始置

鑄錢司按日本紀持統帝八年置鑄錢司而此云始置未詳其故○四年春二月令

越後佐渡修石船柵○重敕王臣蓄兵器○三月僧道

昭死遺言火葬於栗原火葬自此始

外史氏曰夫喪親之終孝子之所盡心也故聖人為

之衣衾為之棺槨殯殮之葬埋之又為之祭祀之禮

事亡如事存所以使為子者盡心也自佛法東流以

後始有火葬之事雖天子之尊歷世行之况庶人乎

夫生而事之死而焚之是刑其屍也有人子之心者

安忍刑父母之屍哉然流俗相承恬不知怪以謂為

其親滅罪甚哉其惑也而作俑始于此可勝歎哉

道昭河內人孝德帝時隨使如唐師事玄奘三藏始習

禪定後隨使歸朝周游天下諸津濟處儲船造槁山背

宇治槁其所創造也○定諸國牧地○夏五月遣使于

新羅○六月敕淨大參忍壁親王直廣壹藤原不比等

選定律令不比等鎌足之子也○秋八月右大臣多治

比鳥任左大臣秋八月已下○冬十月始置製衣冠司

皇朝史略 卷三
十三
○大寶元年春正月乙亥朔帝受朝於大極殿儀衛嚴整蕃客陪位文物之美於是大備○二月始釋奠○三月改制官位停賜位冠易以位記定服色制以大納言阿陪御主人為右大臣○秋七月左大臣多治比島薨先是帝優其高年賜靈壽杖至是薨年七十八○八月律令成○九月上行幸紀伊○冬十月如武漏溫泉○二年春正月己巳朔帝受朝於大極殿親王及大納言已上始著禮服諸王臣以下著朝服○三月始頒度量於天下○夏四月令筑紫七國及越後貢采女兵衛○五月敕從三位大伴安麻呂正四位下粟田真人等參

議朝政○六月遣民部尚書粟田真人左大辨高橋笠間於唐○冬十月頒律令於天下○十二月始闢美濃岐蘇山道○太上皇崩壽五十八本書享年闕今據紹運錄一代要記○三年春正月以三品忍壁親王知太政官事○夏閏四月右大臣阿陪御主人薨○慶雲元年春正月以大納言石上麻呂為右大臣○始停百官跪伏之禮○秋七月粟田真人等還自唐真人至長安見武后賜宴麟德殿真人好學能屬文進止有容唐廷稱其溫雅至長安已下唐書○二年夏五月知太政官事忍壁親王薨○秋九月以二品穗積親王知太政官事○冬十月新羅入貢○

十二月重制天下婦女自非神部齋宮宮人及老嫗皆
 髻髮○三年春三月左京大夫三輪高市麻呂卒高市
 麻呂壬申之亂從天武帝有功持統帝時為中納言以
 極諫不行辭官辭官懷風藻後為左京大夫及卒贈從三位
 高市麻呂好學善詩為世所稱藤原麻呂為詩吊之有
 云君臣誰云易臣義本自難奉規終不用歸去遂辭官
 好學已下懷風藻○秋九月遣使七道始定田租法○是歲天
 下疾疫百姓多死始作土牛大儺○四年春二月詔群
 臣議遷都○夏四月帝崩壽二十五享年據畧記火葬
 飛鳥岡在位十一年改元者二曰大寶慶雲帝天安寬

仁博涉經史最善射藝帝用心政事定律令制朝儀文
 物典章至帝大備云帝母阿閉皇女立是為元明天皇
 元明天皇天智帝第四女也初適皇太子草壁生文武
 元正二帝慶雲四年秋七月即位於大極殿按大極殿始見天武
紀而即位用之始此○和銅元年春三月以右大臣石上麻呂為
 左大臣大納言藤原不比等為右大臣

外史氏曰藤原鎌足佐天智帝一匡天下其有功於
 社稷也大矣及其子不比等能幹父業加以外戚之
 勢職任台司位極人臣厥後子孫家戚里而世鼎鉉
 遂使威福之柄一歸攝關此雖由國家待功臣之厚

抑亦任以政事之弊也觀不比等為右大臣則可見外戚之盛始於此嗚呼有國有家者可不鑒前失而防未然哉

○夏五月始行銀錢○秋八月始行銅錢按先是用銀錢銅錢已見

舊史然錢皆無文至是初鑄和銅開珎錢故曰始行非謂銀錢銅錢之制始于此也○二年春三

月以左大辨巨勢麻呂為鎮東將軍赴陸奧民部大輔佐伯石湯為征狄將軍赴越後內藏頭紀諸人為副徵

遠江駿河甲斐信濃上野越前越中兵征蝦夷○秋八

月廢銀錢行銅錢○征狄將軍佐伯石湯副將軍紀諸

人等凱旋○三年春三月遷都平城置左右京坊置以下

鏡○右大臣藤原不比等創興福寺於新京元亨謂之

山階寺拾芥抄○是歲遷大官大寺於新京初舒明帝遷

大安寺於百濟河上改號百濟大寺天武帝遷之於高

市郡名大官大寺至是復移建焉元亨釋書○四年夏閏六

月始遣挑文師于諸國教織錦綾○五年秋九月始置

出羽國○是歲造鷹居社於豐前宇佐郡祀八幡大神

是歲己下字○六年夏四月割丹波五郡置丹後國割

備前六郡置美作國割日向四郡置大隅國○是歲敕

撰諸國風土記是歲己下一代要記歷代皇紀僧仙覺萬葉集抄○七年春二

月詔從六位上紀清人正八位下三宅藤麻呂撰國史

○八年秋七月知太政官事一品穗積親王薨○九月
帝傳位于冰高內親王在位九年改元者一曰和銅冰
高內親王立是為元正天皇

元正天皇諱冰高一諱新家日本紀皇太子草壁女而

文武帝之姊也至是受禪即位改元靈龜○二年夏四

月割河內大鳥和泉日根三郡置和泉監○秋八月志

貴親王薨○遣從四位下多治比縣守從五位安倍安

麻呂等於唐○冬十月禁內外諸司薄紗朝服六位已

下羅幪頭按幪頭即今之冠○養老元年春二月左大

臣石上麻呂薨○秋九月上行幸美濃觀當耆郡醴泉

初郡中有樵夫事父至孝家極貧鬻薪以養父父嗜酒

樵夫常提瓠過市賒酒以進一日往山新樵誤墜巖谷

之際聞有酒氣心怪之回顧其側有泉涌出其色似酒

嘗之芳烈甘美樵夫大喜汲以供父至是車駕幸美濃

過郡觀之以為孝感所致遂名其泉曰養老因改元授

樵夫官家至富饒初已下十訓抄著聞集○二年夏四月筑後守

道首名率首名少治律令曉習吏事其為筑後守攝肥

後事勸勵生業教督耕種至植菜果養雞豚曲盡事宜

時躬按行有不遵教者輒譴責之老少竊怨罵之及收

入莫不悅服又興陂池以廣灌溉肥後味生池及筑後

所在彼池皆是也人蒙其利故言吏事者咸以為稱首
 及率百姓祠之○五月割越前四郡置能登國割上總
 四郡置安房國割常陸十一郡以六郡置石城國五郡
 置石背國○冬十一月多治比縣守等還自唐○三年
 春二月始令天下百姓右社職事主典已上執笏○秋
 七月始置按察使巡省諸國○冬十二月始定婦女服
 制○四年春正月遣渡島津輕津司等於靺鞨國觀其
 風俗靺鞨古肅慎之地唐書以下在去陸奧宮城郡治可
 三千里多賀城碑土地極寒不宜水田和銅六年渤海大祚
 榮受唐爵命為渤海郡王類聚史盡并肅慎濊泊沃沮高

麗扶餘挹婁等地東國通鑑自是始去靺鞨號專號渤海云
 唐書○三月一品舍人親王上日本紀三十卷○秋八月
 右大臣藤原不比等薨贈太政大臣謚文忠謚據公先
 是藤原氏未置氏長者至不比等始命為之尊卑不比
 等生四子武智麻呂房前宇合麻呂世稱武智麻呂為
 南家房前為北家宇合任式部卿是為式家麻呂右京
 大夫是為京家子孫貴盛而北家尤盛云大鏡以舍人親
 王知太政官事○九月陸奧言蝦夷反殺按察使上毛
 野廣人以播磨按察使丹治比縣守為持節征夷將軍
 從五位上阿倍駿河為持節鎮狄將軍以討蝦夷○五

年春正月以大納言長屋王爲右大臣○夏四月征夷將軍多治比縣守等凱旋○六月割信濃置諏方國○冬十二月太上皇崩壽六十一○八年春二月帝禪位於皇太子在位十年改元者二曰靈龜養老皇太子立是爲聖武天皇

聖武天皇諱美麻斯文武帝子也母夫人藤原氏和銅七年立爲皇太子至是即位改元神龜○春三月陸奧言海道蝦夷反殺陸奧大掾佐伯兒屋麻呂○夏四月以式部卿藤原宇合爲持節大將軍宮內大輔高橋安麻呂爲副將軍征討蝦夷○今坂東九國兵三萬教習

騎射試練軍陣運帛絕綿布於陸奧鎮所○五月以從五位上小野牛養爲鎮狄將軍鎮撫出羽蝦狄○秋七月遣從五位上土師豐麻呂于新羅○冬十月行幸紀伊至玉津島詔改弱濱爲明光浦○十一月太政官奏上古淳朴冬穴夏巢後世聖人易以宮室京師帝王之居萬國所朝自非壯麗何以示威板屋草舍中古遺制難營易破空殫民財請命有司令五位已上及庶人力堪營辦者以瓦葺屋塗爲丹堊奏可○征夷持節大師藤原宇合鎮狄將軍小野牛養還京師○是歲鎮守將軍大野東人始築多賀城以備邊寇

是歲已下○二年

夏五月土師豐麻呂還自新羅○三年夏六月新羅入貢○冬十月行幸播磨印南野○四年秋閏九月皇子生○冬十月立皇子為皇太子○南島人來朝○五年春正月渤海王大武藝遣使獻方物上國書其略曰武藝啓山河異域國土不同延聽風歎但增傾仰伏惟大王天朝受命日本開基奕葉重光本枝百世武藝忝當列國監總諸蕃復高麗之舊居有扶餘之遺俗但以天涯路阻海漢悠悠音耗未通吉凶絕問親仁結援庶叶前經通使聘鄰始于今日謹遣寧遠將軍郎將高仁義等二十餘人齎狀并附貂皮三百張奉送渤海本高麗

之故地高麗滅朝貢久絕至是武藝遣使來聘武藝祚

榮之子也祚榮子○秋八月詔禁天下養鷹○始置內

匠寮中衛府○九月皇太子薨○天平元年春二月殺

左大臣長屋王先是漆部造君足中臣宮處東人誣告王謀

不軌遣兵圍其第又使舍人親王及藤原武智麻呂等

窮問賜自盡王高市皇子之子高市子據好學善詩一

時名流多遊其門好學已下至是遭讒而死今昔時人

冤之○二年春三月太政官奏大學生徒學業庸淺不

能成達實由窮困請選性識聰慧藝業優長者給衣食

以勸誘之又諸蕃異域風俗不同若無譯語難以通事

皇朝通志 卷三十三
令粟田馬養播磨乙安等各教弟子專習漢語並許之
○夏四月詔改天下婦女衣服用新樣○始置皇后宮
職施藥院○三年春三月廢詠方國併信濃國○秋八
月擢式部卿藤原宇合民部卿多治比縣守等六人並
為參議○冬十一月始置畿內總管諸道鎮撫使○四
年夏五月新羅入貢因請朝貢年期詔許三年一朝貢
○秋八月遣從四位上多治比廣成從五位下中臣名
代于唐○五年秋七月始令大膳職備孟蘭盆供著為
恒典按孟蘭盆會始見日本紀齊明紀其後無所
見公事根原溫觴抄以是年為始今據之○六
年春正月以大納言藤原武智麻呂為右大臣○二月

御朱雀門觀歌垣令京師士女縱觀○秋七月觀相撲
戲○是歲鎮守將軍藤原朝鴉修築多賀城立石記道
程里數是歲已下
多賀城碑○七年春二月新羅入貢以新羅私
改國號責却其使○三月遣唐大使多治比廣成還自
唐○冬十一月知太政官事一品舍人親王薨親王天
武皇子也○是歲自夏至冬天下患鼠豆瘡天死者多
○八年春二月遣從五位下阿倍繼麻呂于新羅○秋
七月遣唐副使中臣名代還自唐○九年春二月遣新
羅使還奏新羅失禮不受使命於是召群臣上意見○
三月詔每國造佛像三軀寫大般若經一部始置國分

寺於諸國

始置已下
元亨釋書

○秋七月以右大臣藤原武智麻

呂為左大臣是日薨○九月停筑紫防人大寶制遣諸

國兵士以戍邊塞謂之防人大寶已下令至是停筑紫防人

還本鄉差筑紫人令戍壹岐對馬○以從三位鈴鹿王

知太政官事○冬十二月改大倭國為大養德國○十

年春正月立阿倍內親王為皇太子以大納言橘諸兄

為右大臣諸兄難波皇子曾孫美努王之子也初名葛

城為諸王後賜姓橘宿彌嘗奉使陸奧國司祇承頗怠

諸兄不悅雖設酒饌不肯宴樂有舊宮人奉觴而歌曰

鴉瑣嘉耶摩珂藝散倍美史類也滿濃為濃鴉瑣幾巨

路乎倭禮母波難久爾於是諸兄解顏酣飲極歡而罷

嘗奉使已下萬葉集○太宰府奏新羅入貢夏六月遣使太宰府

却還之○十一年冬十二月渤海入貢先是平群廣成

隨多治比廣成聘唐及還海中遭風飄至崑崙轉而復

至唐取途渤海渤海王欽茂使其若忽州都督忠武將

軍胥要德雲麾將軍已珍蒙送廣成海中又遭風胥要

德船覆溺死至是廣成與已珍蒙入京師珍蒙上其國

書曰欽茂啓山河杳絕國土遙佇望風歎唯增傾仰

伏惟天皇聖睿至德遐暢奕葉重光澤流萬姓欽茂忝

繼祖業監總如始義洽情深每修鄰好今彼國使廣成

等風濤失便漂落投此每加優賞欲待來春發回使等
 苦請及年歸去因備行資即為發遣仍遣若忽州都督
 胥要德等充使領廣成等令送彼國并附大蟲皮羆皮
 各七張人參三十斤蜜三升進上○十二年春正月遣
 使於渤海○三月遣使於新羅○秋八月省和泉監并
 河內國○九月太宰少貳藤原廣嗣舉兵反使從四位
 上大野東人從五位上紀飯麻呂將兵討之○冬十月
 行幸伊勢○十一月藤原廣嗣伏誅廣嗣宇合之子有
 文武才幹文武才幹據松浦社緣起初僧玄昉為僧正居內道場寵
 遇日盛屢稱說法近侍皇后頗有醜聲聞於外屢以下今昔物

語廣嗣惡之又與吉備真備不協上表請斥二人帝不
 納焉廣嗣妻有姿色廣嗣赴任留居京師玄昉欲姦之
 妻告之太宰府廣嗣聞而大怒與真備不協已至是遂下松浦社緣起
 反造營遠珂郡儲兵弩置烽燧朝廷遣東人等討之下
 敕暴白廣嗣罪狀東人擊廣嗣軍破之遂斬廣嗣及其
 弟綱手後七年玄昉死世以為廣嗣祟勝寶初真備謫
 肥前祭廣嗣墓因為立祠謂之鏡廟祭已下松浦社緣起○十二
 月使右大臣橘諸兄經略山背相樂郡恭仁鄉因遷都
 焉○十三年冬十二月敕名新京曰大養德恭仁大宮
 ○十二月并安房于上總能登于越中○十四年春正

月廢太宰府○陸奧言雨赤雪○二月新羅入貢以宮
室未成遣使太宰府饗之○秋八月敕造宮卿智努王
造近江紫香樂宮○行幸紫香樂宮○十五年春二月
并佐渡于越後○夏四月行幸紫香樂○新羅使至筑
前責其失禮却之○五月以右大臣橘諸兄為左大臣
○冬十月詔造金銅盧舍那佛大像○十二月始置筑
紫鎮西府以從四位下石川加美為將軍外從五位下
大伴百世為副先是毀平城大極殿遷於恭仁宮四年
功竣所費巨多至是造紫香樂宮停營恭仁宮○十六
年春閏正月詔召百官於朝堂議恭仁難波二京便利

○二月敕定難波宮為皇都○冬十二月造金銅盧舍
那佛大像於甲賀寺○十七年夏五月車駕還平城居
中宮院諸司百官各歸本曹○六月復置太宰府○秋
八月行幸難波宮○遷東大寺於平城初帝創東大寺
於紫香樂至是移建焉遷東已下元亨釋書○九月知太政官事
鈴鹿王薨○帝不豫敕平城恭仁留守悉追孫王赴難
波宮○冬十一月配僧玄昉於筑紫檢造觀世音寺○
十九年春三月改大養德國復為大倭國○二十年夏
四月太上皇崩壽六十九○秋八月改定釋奠儀式器
服○天平感寶元年春二月陸奧始貢黃金○夏四月

以大納言藤原豐成爲右大臣豐成武智麻呂之子也
○秋七月帝傳位於皇太子在位二十六年改元者三
曰神龜天平天平感寶帝篤崇佛法敬信僧行基等自
稱三寶奴嘗幸東大寺受菩薩戒於唐僧鑑真勝寶八
歲崩帝出家歸佛故不奉謚天平寶字二年追尊曰勝
寶感神聖武皇帝皇太子立是爲孝謙天皇

孝謙天皇諱阿倍聖武帝之女也天平十年立爲皇太
子至是受禪即位改元天平勝寶○秋七月始置紫微
中臺○八月以藤原仲麻呂爲紫微令仲麻呂豐成之
弟也○九月制紫微中臺官位○四年春閏三月遣正

四位下藤原清河從四位上大伴古麻呂從四位上吉
備真備等于唐清河至長安見玄宗玄宗曰聞彼國有
賢主觀其使臣趨揖有異因稱我朝爲君子國命朝衡
接伴又圖清河真備貌及歸賜御製詩特遣鴻臚卿蔣
挑挽送至揚州使魏方進供給至長安已下高僧傳要文抄○夏四
月行幸東大寺慶盧舍那佛大像大設齋會百官陪位
樂官奏樂齋會之盛未嘗有也○六月新羅王子金泰
廉入朝奉貢○五年夏五月渤海遣使獻方物奏曰渤
海王言日本照臨天皇朝不賜使命已經十餘年是以
遣輔國將軍慕施蒙等賣國信物奉獻闕庭壘書報曰

天皇敬問渤海國王朕以寡德虔奉寶圖享毒黎民照臨八極王僻居海外遠使入朝丹心至明深可嘉尚但省來啓無稱臣名仍檢高麗舊記高氏上表文云親是兄弟義則君臣或請援兵或賀踐祚修朝聘之恒式效忠款之懇誠故先朝嘉其貞節待以殊恩寵命之隆惟王所知由是先回之後既賜敕書何其今歲之朝重無上表以禮進退彼此共同王其熟思今使人還指宣往意并賜物○六年春正月大伴古麻呂還自唐奏曰天寶十二載元會唐主受朝舍元殿以臣等列西畔第二吐蕃下新羅使列東畔第一大食國上臣爭曰新羅朝

貢我朝久矣而今反列上頭義所不當乃引新羅使就吐蕃下臣等列大食國上藤原清河與古麻呂發唐遭風漂蕩吉備真備亦遭風飄至紀伊○七歲春正月敕改年為歲○八歲春二月左大臣橘諸兄致仕○夏五月太上皇崩壽五十六遺詔以中務卿道祖王為皇太子○六月始築筑前怡土城○天平寶字元年春正月前左大臣橘諸兄薨○三月廢皇太子○夏四月立大炊王為皇太子初道祖王為太子淫戲無度帝廢之立大炊王先是藤原仲麻呂子真從卒其妻婺居仲麻呂令大炊王居田村第以其子婦妻之至是為儲貳○詔

令天下家藏孝經誦習之○五月復置能登安房和泉

等國○始置紫微內相以大納言藤原仲麻呂為之○

秋七月下左大辨橘奈良麻呂於獄初帝寵藤原仲麻

呂仲麻呂因嬖幸專權奈良麻呂惡其所為陰欲除之

至是遂與廢太子及黃文王安宿王小野東人大伴古

麻呂等謀行廢立山背王上變告之仲麻呂奏帝遣高

麗福信等將兵收東人等又遣兵圍廢太子家遣公卿

究問又收奈良麻呂及其黨下獄廢太子黃文王東人

古麻呂並杖死流安宿王于佐渡其餘或死或配流

良麻呂處罪史無奈良麻呂諸兄之子也○貶右大臣

明文蓋死獄中也

藤原豐成為太宰員外帥豐成為人寬厚甚得時望仲

麻呂忌之每欲因事中傷之會奈良麻呂事起仲麻呂

以豐成子乙繩善奈良麻呂竟誣以其黨遂被竄謫自

是仲麻呂威震中外○二年秋八月帝禪位於皇太子

羣臣上尊號曰上臺寶字稱德孝謙皇帝在位十年改

元者二曰天平勝寶天平寶字皇太子立是為廢帝○

廢帝諱大炊天武帝孫舍人親王之子也天平寶字元

年立為皇太子至是受禪即位○秋八月追尊天武帝

太子草壁曰岡宮天皇○敕紫微內相藤原仲麻呂中

納言石川年足等更定官制改太政官為乾政官太政

廢帝明治二
年七月諡曰
淳仁天皇

大臣曰太師左大臣曰太傅右大臣曰太保大納言曰御史大夫紫微中臺為坤宮官中衛大將曰大尉以仲麻呂為太保賜姓惠美改名押勝字曰尚舅更給功封功田又聽鑄錢舉稻及用私印○是歲小野田守還自渤海奏安祿山反唐大亂敕太宰府曰祿山狂胡若不得志又將掠海東宜預為之備○三年春正月渤海來貢本書書高麗然此時高麗既滅渤海并其地本書從其舊號今聚書渤海以見其實○夏五月敕諸國置常平倉置左右平準署掌之○六月追尊皇考舍人親王曰崇道盡敬皇帝○以將征新羅敕太宰府造行軍式○秋九月敕諸國造戰艦五百艘○冬十

二月置授刀衛○四年春正月以太保惠美押勝為太師○渤海來貢○三月敕鑄新錢銅錢文曰萬年通寶金錢文曰開基勝寶銀錢文曰太平元寶○秋九月新羅入貢以其失禮却之○五年秋七月以巡察使奏令筑紫七國造甲刀弓箭以備邊寇○冬十月以右虎賁衛督仲石伴為遣唐大使石上宅嗣為副使武藏介高麗大山為遣渤海使○七年春正月渤海來貢○二月新羅入貢却之○秋八月廢儀鳳曆行大衍曆○九月以僧道鏡為少僧都道鏡河內人少為僧以禪行聞入內道場為禪師先是太上皇幸保良宮道鏡常侍側帝

以爲言太上皇不說至是遣使山階寺罷少僧都慈訓
以道鏡代之由此太上皇與帝有隙○八年秋九月太
師惠美押勝反伏誅初道鏡得寵太上皇押勝寵稍衰
押勝意不自安乃諷太上皇爲都督四畿內三關近江
丹波播磨等國兵事使掌兵自衛請管內兵士每國二
十五人五日更番集都督衛簡閱武藝準諸國試兵之
法押勝私倍其數用乾政官印而下之既而事覺詔削
押勝官位并除藤原姓字乃遣使守三關押勝遂反與
其黨走據近江山背守日下部子麻呂衛門少尉佐伯
伊多智等先至近江燒勢多搗押勝不得進遂走高島

郡因立冰上鹽燒爲帝以其子真先朝猶爲三品帝敕
從五位下藤原藏下麻呂將兵討之押勝乃使精兵數
十入愛發關授刀物部廣成拒而却之押勝狼狽失據
乘船赴鹽津遭暴風漂蕩乃取山道直赴愛發伊多智
等距之押勝還至高島郡三尾崎與佐伯三野大野真
本等戰自午及申官軍疲頓會藏下麻呂兵至真先引
衆而退三野等乘勝逐北殺傷頗多押勝乘船逃亡官
軍水陸並攻押勝阻勝野鬼江盡銳距戰衆皆潰散與
妻子三四人浮江軍士石村石楯獲押勝斬之傳首京
師餘黨悉平○以太宰負外帥藤原豐成爲右大臣○

皇朝史略 卷三
上皇以僧道鏡為大臣禪師尋敕押勝所改官名悉復其舊○初帝因押勝得立及押勝見誅太上皇以帝為黨押勝冬十月遣兵部卿和氣王左兵衛督山村王外衛大將百濟敬福等率兵數百圍中宮院廢帝為淡路公使右兵衛督藤原藏下麻呂衛送配所幽之一室在位七年太上皇再登祚

稱德天皇初出家為尼至是再臨萬機○天平神護元年春二月改授刀衛為近衛府始置內廐寮○三月禁王臣私蓄兵器○秋八月參議兵部卿和氣王謀反伏誅和氣舍人親王孫三原王之子也時皇嗣未立和氣竊

懷覬覦紀益女以巫鬼受寵和氣厚賂之又與參議粟田道麻呂兵部大輔大津大浦等數會飲密語謀頌泄和氣畏禍及逃亡救索之獲於率河社中流之伊豆至山背相樂郡絞殺之道麻呂大浦等亦坐其黨竄謫○九月更鑄神功開寶錢○冬十月行幸紀伊至玉津島○淡路公薨於配所初帝廢公敕淡路國司具報其動靜又慮廷臣有通心淡路者命嚴守衛至是公不勝憂憤踰垣而逃守佐伯宿禰等率兵邀之公還明日薨於院中○閏月以大臣禪師道鏡為太政大臣禪師詔使文武百官拜賀之○十一月右大臣藤原豐成薨○創

西大寺

創西大寺水鏡元亨釋書

○二年春正月以大納言藤原永

手為右大臣永手房前之子也○夏四月太宰府言防

賊戍邊本資東國之軍今割筑前等兵士以為防人以

其所遺分番上下人非勇健防守難濟望請東國防人

依舊配戍敕計六國所點防人所欠之數差點東人以

填三千使東國勞少西邊兵足○有一男子自稱聖武

帝子石上志斐氏所生勘問無實詔配遠流○冬十月

山階寺僧基真詐咒縛童子教說人陰事作毘沙門像

置數顆小珠於前稱現佛舍利道鏡欲眩眾以為己瑞

乃諷帝赦天下賜人爵一級帝大悅迎舍利擇諸氏有

容貌者二百人服金銀朱紫捧幡蓋列前後百官主典

已上拜之以道鏡善教導僧徒感得舍利詔授法王位

并授基真法參議圓興法臣位圓興基真師也法王月

料準供御法臣準大納言法參議準參議於是道鏡乘

鑾輿服食一擬供御政無鉅細莫不取決○置法王官

職以造宮卿高麗福信為大夫○右大臣藤原永手為

左大臣大納言吉備真備為右大臣○神護景雲元年

春二月車駕臨大學釋奠○二年秋七月敕崇孔子用

文宣王謚初膳大丘カシノオホ隨使如唐見奉謚號孔子至是上

言請用其號從之○冬十二月流法參議基真於飛驒

基真恃勢狂虐不避朝貴至是坐凌突圓興流竄○三年春正月法王道鏡受大臣以下賀於西宮前殿○秋八月流從五位下和氣清麻呂於大隅初太宰主神中臣習宜阿曾麻呂媚附道鏡矯宇佐八幡神教曰令道鏡即位則天下太平矣道鏡聞之稍懷覬覦帝惑之召清麻呂謂之曰朕昨夜夢八幡大神使來曰大神欲憑汝姊法均有言汝宜代之往受神教臨發道鏡瞋目按劍謂清麻呂曰大神欲令我即位故使卿請命因誘以美官路豐永嘗為道鏡之師至是謂清麻呂曰道鏡若登天位吾何面目事之乎吾與二三子從伯夷游耳清

麻呂深然其言

路豐永已下日本後紀

遂詣神宮請教大神憑人

曰我國家開闢以來君臣分定矣以臣為君未之有也天日之嗣必立皇緒無道之人宜早翦除清麻呂還奏道鏡大怒解其本官為因幡員外介未之任追咎其矯神教欺罔朝廷改姓名別部穢麻呂流于大隅道鏡使人殺之於道俄而雷雨晦暝使者未發會敕使來獲免參議藤原百川愍其忠烈割其封戶給之使人已下日本後紀○冬十月行幸飽浪宮遂幸由義宮詔以由義宮為西京河內國為河內職○四年春二月行幸由義宮○夏四月先是藤原仲麻呂之亂帝發願造三層小塔一百萬

至是成分置諸寺○四年秋八月帝崩壽五十三初帝
幸由義與道鏡狎褻道鏡欲益悅帝意進以淫具帝由
此得疾還平城竟不起初帝已下水鏡在位六年并前朝凡十
六年改元者二曰天平神護神護景雲羣臣定策迎白
壁王立之是為光仁天皇

皇朝史略卷之三終

